

醫道統三脈全書

中藏經

應靈洞主探微真人少室山鄧處中序

華先生諱佗字元化性好恬淡喜味方書多遊名山幽
洞徃徃有所遇一日因酒息于公宜山古洞前忽聞人
論療病之法先生訝其異潛逼洞竊聽須臾有人云華
生在邇術可付焉復有一人曰道生性貪不憫生靈安
得付也先生不覺愈駭躍入洞見二老人衣木皮頂草
冠先生躬趨左右而拜曰適聞賢者論方術遂乃忘歸
況濟人之道素所好爲所恨者未遇一法可以施驗徒

自不足耳願賢者少察愚誠乞與開悟終身不負恩首
坐先生云術亦不惜恐異日與子爲累若無高下無貧
富無貴賤不務財賄不憚勞苦矜老恤幼爲急然後可
脫子禍先生再拜謝曰賢聖之語一一不敢忘俱能從
之二老笑指東洞云石床上有一書函子自取之速出
吾居勿示俗流宜秘密之先生時得書回首已不見老
人先生懾怯離洞忽然不見雲奔雨瀉石洞摧塌旣覽
其方論多奇怪從茲施試效無不存神先生未六旬果
爲魏所戮老人之言預有斯驗余迺先生外孫也因吊

先生寢室夢先生引余坐語中藏經真活人法也予可
取之勿傳非人余覺驚怖不定遂討先生舊物獲石函
一具開之得書一帙迺中藏經也予性拙於用復授次
子思因以志其實甲寅秋九月序

中藏經目錄

第一卷

人法於天地論第一

陰陽大要調神論第二

生成論第三

陽厥論第四

陰厥論第五

陰陽禿格第六

寒熱論第七

虛實大論第八

上下不寧第九

脉要論第十

五色脉論第十一

脉病內外證訣第十二

生死要論第十三

病有災怪第十四

水法有六第十五

火法有六第十六

第二卷

風中有五生五死第十七

積聚癥瘕雜蟲第十八

勞傷論第十九

傳尸第二十

論五臟六腑寒熱虛實死生逆順之法第二十一

論肝臟虛實寒熱生死逆從脉證之法第二十二

論膽虛實寒熱生死脉證之法第二十三

論心臟虛實寒熱生死逆順脉證之法第二十四

論小腸虛實寒熱生死逆順脉證之法第二十五
論脾虛實寒熱生死逆順脉證之法第二十六

第三卷

論胃虛實寒熱生死逆順之法第二十七

論肺臟虛實寒熱生死逆順之法第二十八

論大腸虛實寒熱生死逆順之法第二十九

論腎臟虛實寒熱逆順生死之法第三十

論膀胱虛實寒熱逆順生死之法第三十一

論三焦虛實寒熱逆順生死之法第三十二

論痺第三十三

論氣痺第三十四

論血痺第三十五

論肉痺第三十六

論筋痺第三十七

論骨痺第三十八

論治中風偏枯之法第三十九

論五疔狀候第四十

論癰瘡論第四十一

第四卷

論脚弱狀候不同第四十二

論水腫脉證生死疾第四十三

論淋瀝小便不利第四十四

古之與今有餌得火者第四十五

論三痞并方第四十六

辨上痞候并方

辨中痞候并方

辨下痞候并方

論療治有下汗吐補交錯致於死候第四十七
論診雜病必死候第四十八

第五卷

察聲色形證決死法第四十九

藥方

曼應丸

大靈治傳尸明月丹

解勞生肌進食治血養心地黃煎圓

癥瘕

通氣阿魏圓方

諸氣不通胸背痛結塞悶亂宜服醉仙丹治偏枯

不遂皮膚不仁

破黃七神丹

暴喘欲死方

暴咽喉閉氣欲絕

策駐顏長算百補病交藤圓

瘡方通神乳香膏

一切氣漏麝香圓

治厥陰面目俱青心下硬四肢冷脈細而欲絕破
棺散

治陽厥發狂將成疽俗腸湯

起卒死救生丹

脾厥吐瀉霍亂

治心脾卒痛不可忍

左慈真人千金地黃煎

大上延年萬勝追魂散治勞瘦垂死方

葛玄真人百補交精圓

扁鵲玉壺丸

療百病延壽酒

解一切毒玉霜圓

三疇吐血黃疽三黃丸

救百物入咽喉鯁欲死方

第六卷

三茱丸治小腸氣痛

金鈴丸治小腸氣一服立愈

燒肝散治久年不差心勞口瘡

補心丹治因驚失心或因思慮過當心氣不寧狂
言妄語叫呼奔走

椒紅圓治噉不止及補中益氣進食

確砂圓消積溫中順氣治風痰利胸膈尤治傷生
冷嘔逆泄瀉

強中圓治氣消食益脾胃進飲食

養胃丹治脾胃不和全不思飲食中脘停寒嘔逆
惡心臍寒泄痢腹痛腸鳴常服溫中養胃散思飲
食

五皮散大治男子婦人脾胃停滯頭面四肢悉腫
心腹脹滿上氣促急胸膈煩悶痰涎上壅飲食不
下行步氣奔狀如水病先服此藥能疎理脾氣消
退虛腫切不可亂服瀉水等藥以致脾元虛損所
患愈甚此藥平良無毒多服不妨

立効散治腰痛

香芎散治一切頭風

古鄉古敗散治頭風血風又名荆芥散

再甦丹治骨節疼痛語言不正行步艱難手足掉

搗拽

沉香飲子治痞氣升降陰陽
礞石丸治脾積滯氣酒食所傷飲食不化惡心嘔
逆胸膈不快不思飲食胸腹脹滿臍脇有塊心脾
冷痛口吐酸水停飲冷痰疰癖癥瘕發痛無度翻
胃轉食面黃瘦乏四肢頭面浮腫臟腑不調裏急
後重及十膈氣虛中有積婦人血氣塊硬悉皆主
之

紫沉消積丸

五勝散治四時傷寒冒風身熱頭痛昏倦寒痰咳嗽及中滿傷寒三日以前服無不効

治傷寒咳逆噎汗尋常亦可服

如聖散治一切無異色瘡腫消毒併閃胸折傷接

骨定痛活養血脉已破者不可用

第七卷

治惡瘡發背

神効乳香膏治一切瘡腫生肌止痛名金露金屑

丸亦名黃圓子治傷風頭痛肌熱大効白散子治

發背等先用白散子取之次用此藥貼之

妙應膏治疥癬

治惡瘡金瘡刀斧傷見血方

治嵌甲累効

治惡瘡疥癬

佛手膏治膿窠瘡神効

治發背一切癰疽金石藥毒發

貼瘡白膏藥

接骨散治折傷

治金瘡妙方

治內損吐血

越桃散治下血及血利

炙肝散逐胃中風邪益脾進食凡人虛弱用補藥
日久漸至瘦損食少倦怠大便頻數泄漏服此無
不取効妙

地黃散牢牙去齒病

治牙痛神驗

治牙痛及走馬疳

治風氣攻注牙齒腫痛

治喉閉及腫痛

絳雪治喉閉

碧雲治口瘡如咽喉痛腫卽含化

烏龍散治骨槽風牙垠腫有奇功

治口瘡

治喉閉牙關不開者

白龍散治風毒赤爛眼眶倒睫冷熱淚不止滴水

和爲鷄頭大圓子亦得

清中湯治暑氣中渴

皂角散治五腫腸風瀉血下痢糞前有血號外痔
糞後有血號內痔大腸不收號脫肛穀道四面有
努肉如爛號舉痔頭上有孔號漏並治之

白龍散治消渴

神驗柴胡散治大人小兒骨熱夜間如蒸甚者不
過十數日見効

聖餅子治咯血

治產後惡心

艾煎圓治婦人經脉不止

治血山崩甚者

治產後發熱無憂散

治腫毒

治大人小兒偏墜服訖以石壓之

神應烏玉丹治丈夫婦人久新腸風痔瘻著床頭
痛不可忍者服此藥不過三四次便見功效初得
此疾發痒或疼穀道周回多生硬核此是痔如破
是瘻只下血是風皆因酒色氣風食五事過度卽

成此疾人多以外醫塗治病在腸內有蟲若不去
根本其病不除此藥的有神効不可細述

治小兒爛癖

第八卷

常山湯治妊娠患瘡

常山湯治同前

鐵罩散安胎如神

失笑膏治婦人產後血不快刺痛等症

催生治危急神効

白朮丸治小兒白瀉
木香丸治小兒喫食太早遂成疳疾腹脹疳瀉及
釀肚等病

玉柱杖散治小兒疳瘦

沉香養脾丸

佛手膏治眼生翳膜并努肉赤脉攀睛翳暈冷熱
淚下及眼眶赤爛等方

治小兒乳癖胸腹高喘急吐乳方

神朮散治傷風頭痛聲重

理大腸一切下血

治婦人懷姙多墮方

花紅散治惡瘡大効方

治喉閉

治腸風下血

治一切癰疽地黃膏兼治毒蟲所傷

萬全金花散理發背疽瘡疼痛不可忍者

腫在脊骨邊根株如碗蓋大上面有細頭

如粟米粒白色其間亦有如石榴子者即疽瘡也

神仙眼藥并種空青法

種空青法

治胞損小便不禁

治喘嗽上氣

蒲葎葉治一切肺喘劇甚者効如神

治蛇傷

換骨丹治一切卒中手足頑麻腰膝沉重左癱右
瘓截四時傷寒婦人血刺產前產後每一粒酒一
盞碎搥浸至夜温動化散臨睡和滓服小兒驚搐

米飲化半丸

作膏法

治痢疾神効香粟飲子

治爛眶風眼

中藏經目錄終

中藏經卷一

江陰朱氏校刊本

漢華佗元化著

人法於天地論第一

人者上稟天下委地陽以輔之陰以佐之天地順則人
氣泰天地逆則人氣否是以天地有四時五行寒暄動
靜其變也喜爲雨怒爲風結爲霜張爲虹此天地之常
也人有四肢五臟呼吸寤寐精氣流散行爲榮張爲氣
發爲聲此人之常也陽施於形陰慎於精天地之同也
失其守則蒸而熱發否而寒生結作癭瘤陷作癰疽盛

而爲喘滅而爲枯彰於面部見於形體天地通塞一如
此矣故五緯盈虧星辰差忒日月交蝕彗孛飛走乃天
地之災怪也寒暄不時則天地之蒸否也土起石立則
天地之癰疽也暴風疾雨則天地之喘乏也江河竭耗
則天地之枯焦也鑿者決之以藥濟之以鍼化之以道
佐之以事故形體有可救之病天地有可去之災人之
危厄死生稟於天地陰之病也來亦緩而去亦緩陽之
病也來亦速而去亦速陽生於熱熱則舒緩陰生於寒
寒則拳急寒邪中於下熱邪中於上飲食之邪中於中

人之動止本乎天地知人者必有驗於天知天者必有
驗於人天合於人人法於天見天地逆從則知人衰盛
人有百病病有百候候有百變皆天地陰陽逆從而生
苟能窮究乎此如其神耳

陰陽大要調神論第二

天者陽之宗地者陰之屬陽者生之本陰者死之基天
地之間陰陽輔佐者人也得其陽者生得其陰者死陽
中之陽爲高真陰中之陰爲幽鬼故鍾於陽者長鍾於
陰者短多熱者陽之主多寒者陰之根陽務其上陰務

其下陽行也速陰行也緩陽之體輕陰之體重陰陽平則天地和而人氣甯陰陽逆則天地否而人氣厥故天地得其陽則炎熾得其陰則寒凜陽始於子前未於午後陰始於午後未於子前陰陽盛衰各在其時更始更末無有休息人能從之亦智也金匱曰秋首養陽春首養陰陽勿外閉陰勿外侵火出於木水生於金水火通濟上下相尋人能循此永不湮沈此之謂也嗚呼凡愚豈知是理舉止失宜自致其罹外以風寒暑溼內以飢飽勞役爲敗欺殘正體消亡正神縛絆其身死生告陳

殊不知脈有五死氣有五生陰家脈重陽家脈輕陽病
陰脈則不永陰病陽脈則不成陽候多語陰症無聲多
語者易濟無聲者難榮陽病則旦靜陰病則夜甯陰陽
運動得時而行陽虛則暮亂陰虛則朝爭朝暮交錯其
氣厥橫死生致理陰陽中明陰氣下而不上曰斷絡陽
氣上而不下曰絕經陰中之邪曰濁陽中之邪曰清火
來坎戶水到離扃陰陽相應方乃和平陰不足則濟之
以水母陽不足則助之以火精陰陽濟等各有攀陵上
通三寸曰陽之神路下通三寸曰陰之鬼程陰常宜損

陽常宜盈居之中者陰陽勻停是以陽中之陽天仙賜
號陰中之陰下鬼持名順陰者多消滅順陽者多長生
逢斯妙趣無所不靈

生成論第三

陰陽者天地之樞機五行者陰陽之終始非陰陽則不
能爲天地非五行則不能爲陰陽故人者成於天地敗
於陰陽也由五行逆從而生焉天地有陰陽五行人有
血脈五臟五行者金木水火土也五臟者肺肝心腎脾
也金生水水生木木生火火生土土生金則生成之道

循環無窮肺生腎腎生肝肝生心心生脾脾生肺上下
榮養無有休息故金匱至真要論云心生血血爲肉之
母脾生肉肉爲血之舍肺屬氣氣爲骨之基腎應骨骨
爲筋之本肝系筋筋爲血之源五臟五行相成相生晝
夜流轉無有始終從之則吉逆之則凶天地陰陽五行
之道中含於人人得者可以出陰陽之數奪天地之機
悅五行之要無終無始神仙不死矣

陽厥論第四

驟風暴熱雲物飛颺晨晦暮晴夜炎晝冷應寒不寒當

雨不雨水竭土壤時歲大旱草木枯悴江河乏涸此天地之陽厥也暴壅塞忽喘促四肢不收二腑不利耳聾目盲咽乾口焦舌生瘡鼻流清涕頰赤心煩頭昏腦重雙睛似火一身如燒素不能者乍能素不欲者乍欲登高歌笑棄衣奔走狂言妄語不辨親疎發躁無度飲水不休胸膈膨脹腹與脇滿悶背疽肉爛煩潰消中食不入胃水不穿腸驟腫暴滿叫呼昏冒不省人事疼痛不知去處此人之陽厥也陽厥之脈舉按有力者生絕者死

陰厥論第五

飛霜走雹朝昏暮靄雲雨飄颻風露寒冷當熱不熱未
寒而寒時氣霖霑泉生田野山摧地裂土壤河溢月晦
日昏此天地之陰厥也暴啞卒寒一身拘急四肢拳攣
脣青面黑目直口噤心腹滿痛頭顙搖鼓腰腳沈重語
言蹇澀上吐下瀉左右不仁大小便活吞吐酸滌悲憂
慘慼喜怒無常者此人之陰厥也陰厥之脈舉指弱按
指大者生舉按俱絕者死一身悉冷額汗自出者亦死
陰厥之病過三日勿治

陰陽否格論第六

陽氣上而不下曰否陰氣下而不上亦曰否陽氣下而不上曰格陰氣上而不下亦曰格否格者謂陰陽不相從也陽奔於上則燔脾肺生其疸也其色黃赤皆起於陽極也陰走於下則冰腎肝生其厥也其色青黑皆發於陰極也疸爲黃疸也厥爲寒厥也由陰陽否格不通而生焉陽燔則治以水陰厥則助以火乃陰陽相濟之道耳

寒熱論第七

人之寒熱往來者其病何也此乃陰陽相勝也陽不足則先寒後熱陰不足則先熱後寒又上盛則發熱下盛則發寒皮寒而燥者陽不足皮熱而燥者陰不足皮寒而寒者陰盛也皮熱而熱者陽盛也熱發於下則陰中之陽邪也熱發於上則陽中之陽邪也寒起於上則陽中之陰邪也寒起於下則陰中之陰邪也寒而頰赤多言者陽中之陰邪也熱而面青多言者陰中之陽邪也寒而面青多言者陰中之陰邪也若不言者不可治也陰中之陰中者一生九死陽中之陽中者九生一死陰

病難治陽病易醫診其脈候數在上則陽中之陽也數
在下則陰中之陽也遲在上則陽中之陰也遲在下則
陰中之陰也數在中則中熱遲在中則中寒寒用熱取
熱以寒攻逆順之法從乎天地本乎陰陽也天地者人
之父母也陰陽者人之根本也未有不從天地陰陽者
也從者生逆者死寒之又寒熱之又熱者生金匱大要
論云夜發寒者從夜發熱者逆晝發熱者從晝發寒者
逆從逆之兆亦在乎審明

虛實大要論第八

病有臟虛臟實腑虛腑實上虛上實下虛下實狀各不同宜深消息腸鳴氣走足冷手寒食不入胃吐逆無時皮毛憔悴肌肉皴皴耳目昏塞語聲破散行步喘促精神不收此五臟之虛也診其脈舉指而活按之而微看在何部以斷其臟也又按之沈小弱微短濇軟濡俱爲臟虛也虛則補益治之常情耳飲食過大小便難胸膈滿悶肢節疼痛身體沈重頭目昏眩脣腫脹咽喉閉塞腸中氣急皮肉不仁暴生喘乏偶作寒熱瘡疽并起悲喜時來或自痿弱或自高強氣不舒暢血不流通此

臟之實也診其脈舉按俱盛者實也又長浮數疾洪緊
弦大俱曰實也看在何經而斷其臟也頭疼目赤皮熱
骨寒手足舒緩血氣壅塞丹瘤更生咽喉腫痛輕按之
痛重按之快食飲如故曰腑實也診其脈浮而實大者
是也皮膚搔癢肌肉膜脹食飲不化大便滑而不止診
其脈輕手按之得滑重手按之得平此乃腑虛也看在
何經而正其時也胸膈痞滿頭目碎痛飲食不下腦項
昏重咽喉不利涕唾稠粘診其脈左右寸口沈結實大
者上實也頰赤心忪舉動顛慄語聲嘶啞唇焦口乾喘

乏無力面少顏色頤頷腫滿診其左右寸脈弱而微者
上虛也大小便難飲食如故腰腳沈重臍腹疼痛診其
左右手脈尺中脈伏而澀者下實也大小便難飲食進
退腰腳沈重如坐水中行步艱難氣上奔衝夢寐危嶮
診其左右尺中脈滑而濇滑濇不兼見當有誤者下虛也病人脈
微澁短小俱屬下虛也

上下不甯論第九

脾病者上下不甯何謂也脾上有心之母下有肺之子
心者血也屬陰肺者氣也屬陽脾病則上母不甯母不

甯則爲陰不足也陰不足則發熱又脾病則下子不甯
子不甯則爲陽不足也陽不足則發寒脾病則血氣俱
不甯血氣不甯則寒熱往來無有休息故脾如瘧也謂
脾者土也心者火也肺者金也火生土土生金故曰上
有心母下有肺子脾居其中病則如斯耳他臟上下皆

法於此也

按脾如當
作如脾

脈要論第十

脈者乃氣血之先也氣血盛則脈盛氣血衰則脈衰氣
血熱則脈數氣血寒則脈遲氣血微則脈弱氣血平則

脈緩又長人脈長短人脈短性急則脈急性緩則脈緩
反此者逆順此者從也又諸數爲熱諸遲爲寒諸緊爲
痛諸浮爲風諸滑爲虛諸伏爲聚諸長爲實諸短爲虛
又短澀沈遲伏皆屬陰數滑長浮緊皆屬陽陰得陰者
從陽得陽者順違之者逆陰陽消息以經而處之假令
數在左手得之浮者熱入小腸得之沈者熱入於心餘
皆倣此

五色

一作絕

脈論第十一

面青無右關脈者脾絕也面赤無右寸脈者肺絕也面

白無左關脈者肝絕也面黃無左尺脈者腎絕也面黑無左寸脈者心絕也五絕者死夫五絕當時即死非其時則半歲死然五色雖見而五脈不見即非病者矣

脈病外內證決論第十二

病風人脈緊數浮沈有

疑有脫字

汗出不止呼吸有聲者死

不然則生病氣人一身悉腫四肢不收喘無時厥逆不

溼

似係溫字之訛

脈候沈小者死浮大者生病勞人脫肛骨肉

相失聲散嘔血陽事不禁夢寐交侵呼吸不相從晝涼夜熱者死吐膿血者亦死其脈不數有根蒂者及頰不

赤者生病腸澀者下膿血病人脈急皮熱食不入腹脹
目瞪者死或一身厥冷脈沈細而不生生字似誤者亦死食
如故脈沈浮有力而不絕者生病熱人四肢厥脈弱不
欲見人食不入利下不止者死食入四肢溫脈大語狂
無睡者生病寒人狂言不寐身冷脈數喘息目直者死
脈有力而不喘者生陽病人精神顛倒寐而不惺言語
失次脈候浮沈有力者生無力及食不入胃下利不定
者死久病人脈大身瘦食不充腸言如不病坐卧困頓
者死若飲食進退脈小而有力言語輕嘶額無黑氣大

便結澀者生大凡陽病陰證陰病陽證身瘦脈大肥人脈衰上下交變陰陽顛倒冷熱相乘皆屬不吉從者生逆者死治療之法宜深消息

生死要論第十三

凡不病而五行絕者死不病而性變者死不病而暴語妄者死不病而暴不語者死不病而暴喘促者死不病而暴強厥一作中者死不病而暴目盲者死不病而暴耳聾者死不病而暴痿緩者死不病而暴腫滿者死不病而暴大小便結者死不病而暴無脈者死不病而暴昏

冒如醉者死此皆內氣先盡

絕一作

故也逆者即死順者

二年無有生者也

病有災怪論第十四

病有災怪何謂也病者應寒而反熱應熱而反寒應吐

而不吐應瀉而不瀉應汗而不汗應語而不語應寐而

不寐應水而不水皆屬災怪也此乃五臟之氣不相隨

從而致之矣四逆者不治四逆者謂主客運氣俱不得

時也

水法有六論第十五

病起於六腑者陽之系也陽之發也或上或下或內或外或畜在中行之極也有能歌笑者有能悲泣者有能奔走者有能呻吟者有自曲委者有自高賢者有寤而不寐者有寐而不寤者有能食而不便利者有不能食而便自利者有能言而聲清者有不能言而聲昧者狀各不同皆生六腑也喜其通者因以通之喜其塞者因以塞之喜其水者以水濟之喜其冰者以冰助之病者之樂慎勿違背亦不可強抑之也如此從順則十生其十百生其百疾無不愈矣

火法有五論第十六

病起於五臟者皆陰之屬也其發也或偏枯或痿躄或外寒而內熱或外熱而內寒或心腹膨脹或手足拳攣或口眼不正或皮膚不仁或行步艱難或身體強硬或吐瀉不息或疼痛不甯或暴無語或久無音髭髭默默狀若死人如斯之候備出於陰陰之盛也陽必不足陽之盛也陰必不盈故前論云陽不足則助之以火精陰不足則濟之以水母者是也故喜其汗者汗之喜其溫者溫之喜其熱者熱之喜其火者火之喜其湯者湯之

温熱湯火亦在其宜慎勿強之如是則萬全其萬水火
之法真陰陽也治救之道當詳明矣

中藏經卷一終

中藏經卷二

漢華佗元化著

風中有五生死論第十七

風中有五者謂心肝脾肺腎也五臟之中其言生死狀各不同心風之狀

一作候

汗自出而好偃仰卧不可轉側

言語狂妄若脣正赤者生宜於心俞灸之若脣面或青或黃或白或黑其色不定眼瞶動不休者心絕也不可救過五六日即死耳肝風之狀青色圍目連額上但坐不得倨僂者可治若喘而目直視脣面俱青者死肝風

宜于肝俞灸之脾風狀一身通黃腹大而滿不嗜食四肢不收持若手足未青而面黃者可治不然卽死脾風宜于脾俞灸之腎風之狀但踞坐而腰腳重痛也視其脇下未生黃點者可治不然卽死矣腎風宜灸腎俞穴也肺風之狀胸中氣滿冒昧汗出鼻不聞香臭喘而不得卧者可治若失血及妄語者不可治七八日死肺風宜于肺俞灸之凡診其脈滑而散者風也緩而大浮而一作虛軟而弱皆屬風也中風之病鼻下赤黑相兼吐而身直者七日死也又中風之病口噤筋急脈遲者

生脈急而數者死又心脾俱中風則舌強不能言也肝
腎俱中風則手足不遂也風之厥皆由於四時不從之
氣故爲病焉有癱瘳者有偏枯者有失音者有歷節者
有顛厥者有疼痛者有聾瞽者有瘡癩者有脹滿者有
喘乏者有赤白者有青黑者有瘙痒者有狂妄者皆起
於風也其脈浮虛者自虛而得之實大者自實而得之
弦緊者汗出而得之喘乏者飲酒而得之癩厥者自勞
而得之手足不逆者言語寒澀者房中而得之癱瘳者
自痺一作卑溼而得之歷節疼痛者因醉犯房而得之聾

瞽瘡癩者自五味飲食冒犯禁忌而得之千端萬狀莫
離於五臟六腑而生矣所使之候配以此耳

積聚癥瘕雜蟲論第十八

積聚癥瘕雜蟲者皆五臟六腑真氣失而邪氣併遂乃
生焉久之不除也或積或聚或癥或瘕或變爲蟲其狀
各異有能害人者有不能害人者有爲病緩者有爲病
速者有疼者有痒者有生頭足者有如杯塊者勢類不
同蓋因內外相感真邪相犯氣血熏搏交合而成也積
者系于臟也聚者系于腑也癥者系于氣也瘕者系于

血也蟲者乃血氣食物相感而化也故積有五聚有六
癥有十二瘕有八蟲有九其名各不同也積有心肝脾
肺腎也聚有大腸小腸膽胃膀胱三焦之六名也癥有
勞氣冷熱虛實風溼食藥思憂之十二名也瘕有青黃
燥血脂狐蛇鼈之八名也蟲有伏虵白肉肺胃赤弱蟻
之九名也爲病之說出於諸論治療之法皆具於後

勞傷論第十九

勞者勞於神氣也傷者傷於形容也飢飽無度則傷脾
思慮過度則傷心色慾過度則傷腎起居過常則傷肝

喜怒悲愁過度則傷肺又風寒暑溼則傷于外飢飽勞
役則敗于內晝感之則病榮夜感之則病衛榮衛經行
內外交運而各從其晝夜也勞於一一起爲二二傳於
三三通於四四干於五五復犯一一至於五邪乃深藏
真氣自失使人肌肉消神氣弱飲食減行步艱難及其
如此雖司命亦不能生也故調神氣論曰調神氣慎酒
色節起居省思慮薄滋味者長生之大端也診其脈甚
數一作數甚
餘下倣此甚急甚細甚弱甚微甚澀甚滑甚短甚長
甚浮甚沈甚緊甚弦甚洪甚實皆生於勞傷

傳尸論第二十

傳尸者非一門相染而成也人之血氣衰弱臟腑虛羸
中於鬼氣因感其邪遂成其疾也其候或咳嗽不已或
胸膈妨悶或肢體疼痛或肌膚消瘦或飲食不入或吐
利不定或吐膿血或嗜水漿或好歌詠或愛悲愁或顛
風一作狂發歇或便溺艱難或因酒食而遇或因風雨而
來或問病弔喪而得或朝走暮遊而逢或因氣聚或因
血行或露卧於田野或偶會於園林鍾此病死之氣染
而爲疾故曰傳尸也治療之方備於篇末

論五臟六腑虛實寒熱生死逆順之法第二十一
夫人有五臟六腑虛實寒熱生死逆順皆見於形證脈
氣若非診察無由識也虛則補之實則瀉之寒則溫之
熱則涼之不虛不實以經調之此乃良醫之大法也其
諸脈證具如篇末

論肝臟虛實寒熱生死逆順脈證之法第二十二
肝者與膽爲表裏足厥陰少陽是其經也壬子春春乃
萬物之始生其氣嫩而軟虛而寬故其脈弦軟不可發
汗弱則不可下弦長曰平反此曰病脈虛而弦是謂太

過病在外太過則令人善忘忽忽眩冒實而微是謂不

及病在內不及則令人胸痛引兩脇脹滿大凡肝實則

引兩脇下痛引小腹令人本無此喜怒虛則如人將捕

之其氣逆則頭痛耳聾頰赤腫一作其脈沈之而急浮之

亦然主脇肋支一作滿小便難頭痛目眩其脈急甚惡言

微急氣在胃脇下緩甚嘔逆微緩水痺大甚內癰吐血

微大筋痺小甚多飲微大本作消痺本作滑甚頰疝微

滑遺溺瀉甚流飲微瀦癢攣變也本無此又肝之積氣

在脇久不去發為咳逆或為疝瘡也虛則夢花草茸茸

實則夢山林茂盛肝之病旦喜一作慧晚甚夜靜肝病則

頭痛脇痛

本無此二字

目眩肢滿囊縮小便不通

一作利

十日

死又身熱惡寒四肢不舉其脈當弦長而急反短而濇

乃金克木也十死不治又肝中寒則兩臂痛不能舉舌

本燥多太息胸中痛不能轉側其脈左關上遲而澀者

是也肝中熱則喘滿而多怒目疼腹脹滿不嗜食所作

不定睡中驚悸眼赤視不明其脈左關陰實者是也肝

虛冷則脇下堅痛目盲臂痛發寒熱如瘧狀不欲食婦

人則月水不來而氣急其脈左關上沈而弱者是也

論膽虛實寒熱生死逆順脈證之法第二十三

膽者中正之腑也號曰將軍決斷出焉言能喜怒剛柔也與肝爲表裏足少陽是其經也虛則傷寒寒則恐畏頭眩不能獨卧實則傷熱熱則驚悸精神不守卧起不甯又立水發則其根在于膽先從頭面起腫至足也又肝欬久不已則邪傳入于膽嘔清苦汁也又膽病則喜太息口苦嘔清汁一作宿汁心中澹澹恐如人將捕之咽中介介然數唾又膽脹則舌一作脇下痛口苦太息也邪氣客于膽則夢鬪訟其脈診在左手關上浮而得之者是

其部也膽實熱則精神不守又膽熱則多睡膽冷則無
眠又左關上脈陽微者膽虛也陽數者膽實也陽虛者
膽絕也

論心臟虛實寒熱生死逆順脈證之法第二十四

心者五臟之尊號帝王之稱也與小腸爲表裏神之所
舍又主于血屬于火壬子夏手少陰是其經也凡夏脈
鉤來盛去衰故曰鉤反此者病來盛去亦盛此爲太過
病在外來衰去盛此爲不及病在內太過則令人身熱
而骨痛口瘡舌焦引水不及則令人煩躁一作上爲欬

唾下爲氣洩其脈來累累如連珠如循琅玕曰平脈來

累累

一本無此四字卻作喘喘

連屬其中微曲曰病來前曲後倨如

操帶鉤曰死又思慮過多則怵惕怵惕傷心心傷則神

失神失則恐懼又真心痛手足寒過節五寸則旦得夕

死夕得旦死又心有水氣則痺氣滯身腫不得卧煩而

躁其陰腫也又心中風則翕翕

一作吸吸

發熱不能行立心

中飢而不能食食則吐嘔夏心王左手寸口脈洪浮大

而散曰平反此則病若沈而滑者水來克火十死不治

弦而長者水來歸子其病自愈緩而大者土來入火爲

微邪相干無所害又心病則胷中痛四一作脇支滿脹肩

背臂膊皆痛虛則多驚悸惕惕然無眠胷腹及腰背引

痛喜一作善悲時眩仆心積氣久不去則苦憂煩心中痛

實則喜笑不息夢火發心氣盛則夢喜笑及恐畏邪氣

客于心則夢山邱煙火心脹則心煩短氣夜卧不甯心

腹痛懊懣腫氣來往上下行痛有時休作心腹中熱喜

水涎出是虻蛟虻恐是虻字蛟恐是咬字心也心病則日中慧夜半

甚平日靜又左手寸口脈大甚則手內熱赤一作腹腫大

甚則胷中滿而煩澹澹面赤目黃也又心病則先心痛

而咳不止關膈一作格不通身重不已三日死心虛則畏

人瞑目欲眠精神不倚魂魄妄亂心脈沈小而緊浮之

不喘苦心下氣堅食不下喜咽乾手熱煩滿多忘太息

此得之思憂太過也其脈緩甚則發狂笑微緩則吐血

大甚則喉閉一作痺微大則心痛引背善淚出小甚則善

噦微小則消痺一作痺滑甚則為渴微滑則心疝引臍腹

一作腸鳴澀甚則瘖不能言微澀則血溢手足厥耳鳴癩

疾又心脈搏堅而長主舌強不能語一作言軟而散當懼

怯不食也又急甚則心疝臍下有病形煩悶少氣大熱

上煎又心病狂言汗出如珠身厥冷其脈當浮而大反
沈濡而滑其色當赤今反黑者水尅火十死不治又心
之積沈而空空然時上下往來無常處心病胃滿悸腰

腹中熱頰一作面赤咽乾心煩掌中熱甚則嘔血夏一作木

春差冬甚宜急療之止于旬日也又赤黑色入口必死也

面黃目赤者亦一作不死赤如衄血亦死又憂恚思慮太

過心氣內索其色反和而盛者不出十日死扁鵲曰心

絕則一日死色見凶多而人雖健敏名為行尸一歲之

中禍必至矣又其人語聲前寬而後急後聲不接前聲

其聲濁惡其口不正冒昧喜笑此風入心也又心傷則
心壞爲水所乘身體手足不遂骨節解舒緩不自出下
利無休息此疾急宜治之不過十日而亡也又笑小待
呻而復憂此水乘火也陰擊于陽陰起陽伏伏則生熱
熱則生狂冒昧妄亂言語錯誤不可採問一作心已損
矣扁鵲曰其人唇口赤即可治青黑卽死又心瘧則先
煩一作顫而後渴翁翁發熱也其脈浮緊而大者是也心
氣實則小便不利腹滿身熱而重溫溫欲吐吐而不出
喘息急不安卧其脈左寸口與人迎皆實大者是也心

虛則恐懼多驚憂思不樂胃腹中苦痛言語戰慄惡寒恍惚面赤目黃喜衄血診其脈左右寸口兩虛而微者是也

論小腸虛實寒熱生死逆順脈證之法第二十五

小腸者受盛之腑也與心為表裏手太陽是其經也心

與一本無此二字小腸絕者六日死絕則髮直如麻汗出不已

不得屈伸者是也又心咳本作病久不已本無此二字則傳小

腸小腸欬則氣欬俱出也小腸實則傷熱熱則口生瘡

虛則生寒寒則泄膿血或泄黑水其根在小腸也又小

腸寒則下腫重有熱久不出則漸生痔疾有積則當暮發熱明旦而止也病氣發則令人腰下重食則窘迫而便難是其候也小腸脹則小腹臙脹引腹而痛也厥邪入小腸則夢聚井邑中或咽痛頷腫不可回首肩如杖一作拔脚如折也又黃帝曰心者主也神之舍也其臟周密而不傷傷則神去神去則身亡矣故人心多不病病卽死不可治也惟小腸受病多矣又左手寸口陽絕者無小腸脈也六日死病臙痺小腹中有疝瘕也左手寸口脈實大者小腸實也有熱邪則小便赤澀又實熱則

口生瘡身熱去來心中煩滿體重又小腸主于舌之官也
也和則能言而機關利健善別其味也虛則左寸口脈
浮而微軟弱不禁按病爲驚狂無所守下空空然不能
語者是也

論脾臟虛實寒熱生死逆順脈證之法第二十六
脾者土也諫議之官主意與智消磨五穀寄在其中養
于四旁王于四季正王長夏與胃爲表裏足太陰是其
經也扁鵲曰脾病則面色萎黃實則舌強直不嗜食嘔
逆四肢緩虛則精不勝元氣乏失溺不能自持其脈來

似水之流曰太過病在外其脈來如鳥之距曰不及病

在內太過則令人四肢沈重語言蹇澀不及則令人中

滿不食乏力手足緩弱不遂涎引口中一作四肢腫脹

溇瀉一作泄不時夢中飲食脾脈來而和柔去似雞距踐

地曰平脈來實而滿稍數如雞舉足曰病又如鳥一作雀

之啄如鳥之距如屋之漏曰死中風則翕翕發熱狀若

醉人腹中煩滿皮肉潤短氣者是也王時其脈阿阿

然緩曰平反弦急者肝來尅脾真鬼相遇大凶之兆反

微瀼而短者肺來乘脾不治而自愈反沈而滑者腎來

從脾亦為不妨反浮而洪心來生脾不為疾耳脾病面
 黃體重失便目直視脣反張手足爪甲青四肢逆吐食
 百節疼痛不能舉其脈當浮大而緩今反弦急其色當
 黃而反青此十死不治也又脾病其色黃飲食不消心
 腹脹滿身體重肢節痛大便硬小便不利其脈微緩而
 長者可治脾氣虛則大便滑小便利汗出不止五液注
 下為五色注利下也 此四字疑是注文 又積氣久不愈則四肢
 不收黃疸飲食不為肌膚氣滿脹而喘不定也又脾實
 則時夢築垣牆蓋屋脾盛則夢歌樂虛則夢飲食不足

厥邪客于脾則夢大澤邱陵風雨壞屋脾脹則善噦四肢急體重不食善噫脾病則日昞慧平旦甚日中持下晡靜脈急甚則瘕瘕微急則胃膈中不利食入而還出脈緩甚則痿厥微緩則風痿四肢不收大甚則擊仆微大則痺疝氣衰大膿血在胃腸之外小甚則寒熱作微小則消痺滑甚則頽疝微滑則蟲毒腸鳴中熱瀦甚則腸癰微瀦則內潰下膿血脾脈之至也大而虛則有積氣在腹中有厥氣名曰厥疝女子同法得之四肢汗出當風也脾絕則十日死又臍出一作者亦死脣焦枯無

紋理而青黑者脾先絕也脾病面黃目赤者可治青黑

色入口則半歲死色如枳實者一

一作半

月死吉凶休否

一作

皆見其色出于部分也又口噤唇黑四肢重如山

不能自收持大小便利無休歇食飲不入七日死又唇

雖痿黃語聲嚶嚶者可治脾病瘧氣久不去腹中痛鳴

徐徐熱汗出其人本意寬緩今忽反常而嗔怒正言而

鼻笑不能答人者此不過一月禍必至矣又脾中寒熱

則皆使人腹中痛不下食又脾病則舌強語澀轉筋卵

縮牽陰股引髀痛身重不思食鼓脹變則水泄不能卧

者死不治也脾正熱則面黃目赤季脇痛滿也寒則吐
涎沫而不食四肢痛滑泄不已手足厥甚則顫慄如瘡
也臨病之時要在明證詳脈然後投湯丸求其痊損耳

中藏經卷二終

中藏經卷三

漢 華佗元化著

論胃虛實寒熱生死逆順脈證之法第二十七

胃者腑也又名水穀之海與脾爲表裏胃者人之根本也胃氣壯則五臟六腑皆壯足陽明是其經也胃氣絕則五日死實則中脹便難肢節疼痛不下食嘔吐不已虛則腸鳴脹滿引水滑泄寒則腹中痛不能食冷物熱則面赤如醉人四肢不收持不得安卧語狂目亂便硬者是也病甚則腹脇脹滿吐逆不入食當心痛上下不

通惡聞食臭嫌人語振寒喜伸欠胃中熱則脣黑熱甚
 則登高而歌棄衣而走顛狂不定汗出額上黽衄不止
 虛極則四肢腫滿胃中短氣穀不化中消也胃中風則
 溏泄不已胃不足則多飢不消食病人鼻下平則胃中
 病渴者不可治一本無上十三字作微燥而渴者可治胃脈搏堅而長其
 色黃赤者當病折腰一作脾其脈軟而散者病食痺左關
 上脈浮而大者虛也浮而短濇者實也浮而微滑者亦
 實也浮而遲者寒也浮而數者熱也虛實寒熱生死之
 法察而端謹則成神妙也

論肺臟虛實寒熱生死逆順脈證之法第二十八

肺者魄之舍生氣之源號為上將軍乃五臟之華蓋也

外養皮毛內榮腸胃與大腸為表裏手太陰是其經也

肺氣通于鼻和則能知香臭矣有寒則善欬

本作有疾則喜欬

實則鼻流清涕凡虛實寒熱則皆使人喘嗽實則夢刀

兵恐懼肩息胷中滿虛則寒生

一作熱 一作欬 一作喘

息利下少

氣力多悲感王于秋其脈浮而毛曰平又浮而短濇者

肺脈也其脈來毛而中央堅兩頭

一作傍

虛曰太過病在

外其脈來毛而微曰不及病在內太過則令人氣逆胷

滿背痛不及則令人喘呼而欬

一作嗽

上氣見血下聞病

音又肺脈厭厭聶聶如落榆莢曰平來不上不下如循
雞羽曰病來如物之浮如風吹鳥背上毛者死真肺脈
至大而虛又如以毛羽中人皮膚其色赤其毛折者死
又微毛曰平毛多曰病毛而弦者曰春病弦甚曰卽病
又肺病吐衄血皮熱脈數頰赤者死也又久咳而見血
身熱而短氣脈當濇今反浮大色當白今反赤者火尅
金十死不治也肺病喘咳身但寒無熱脈遲微者可治
秋王于肺其脈當浮濇而短曰平而反洪大而長是火

刑金亦不可治又得軟而滑者腎來乘肺不治自愈反
浮大而緩者是脾來生肺不治而差反弦而長者是肺
被肝從爲微邪雖病不妨虛則不能息耳重嗑乾喘咳
上氣胷背痛有積則脇下脹滿中風則口燥而喘身運
而重汗出而冒悶其脉按之虛弱如蔥葉下無根者死
中熱則唾血其脈細緊浮數乳滑皆失血病此由躁擾
嗔怒勞傷得之氣壅結所爲也肺脹則其人喘咳而目
如脫其脈浮大者是也又肺痿則吐涎沫而咽乾欲飲
者爲愈不飲則未差又咳而遺溺者上虛不能制下也

其脈沉濁者病在內浮清者病在外肺死則鼻孔開而
黑枯喘而目直視也又肺絕則十二日死其狀足滿瀉
痢不覺出也面白目青此謂亂經此雖天命亦不可治
又飲酒當風中于肺則咳嗽喘悶見血者不可治無血
者可治面黃目白者可治肺病頰赤者死又言音喘急
短氣好唾一作睡此爲真鬼相害十死十百死百大逆之
兆也又陽氣上而不降燔於肺肺自結邪脹滿喘急狂
言瞑目非常所說而口鼻張大小便頭俱脹飲水無度
此因熱傷于肺肺化爲血不可治則半歲死又肺瘧使

人心寒寒甚則發熱寒熱往來休作不定多驚咳喘如有所見者是也其脈浮而緊又滑而數又遲澹而小皆爲肺瘧之脈也又其人素聲清而雄者暴不響亮而拖氣用力言語難出視不轉睛雖未爲病其人不久又肺病實則上氣喘急咳嗽身熱脈大也虛則力乏喘促右脇脹語言氣短一作促者是也又乍寒乍熱鼻塞頤赤面白皆肺病之候也

論大腸虛實寒熱生死逆順脈證之法第二十九
大腸者肺之腑也爲傳送之司號監倉之官肺病久不

已則傳入大腸手陽明是其經也寒則泄熱則結絕則泄利無度利絕而死也熱極則便血又風中大腸則下血又實熱則脹滿而大便不通虛寒則滑泄不定大腸者乍虛乍實乍來乍去寒則溏泄熱則垢重有積物則寒慄而發熱有如瘧狀也積冷不去則當臍而痛不能久立痛已則泄白物是也虛則喜滿喘咳而喉咽中如核妨矣

論腎藏虛實寒熱生死逆順脈證之法第三十

腎者精神之舍性命之根外通於耳男以閉一作庫精女

以包血與膀胱爲表裏足少陰太陽是其經也腎氣絕則不盡其天命而死也王於冬其脈沈濡曰平反此者

病其脈彈石名曰太過病在外其去如數者爲不及病

在內太過則令人解休脊脈痛而少氣本作令人體瘠而少氣不欲言

不及則令人心懸如饑眇中清脊中痛小腸腹滿小便

滑本云心如懸少腹痛小便滑變赤黃色也又腎脈來喘喘累累如

鉤按之而堅曰平又來如引葛按之益堅曰病來如轉

索辟辟如彈石曰死又腎脈但石無胃氣亦死腎有水

則腹大臍腫腰重痛不得溺陰下溼如牛鼻頭汗出足

爲逆寒大便難其面反瘦也腎病手足逆冷面赤目黃
小便不禁骨節煩痛小腹結痛氣上衝心脈當沈細而
滑今反浮大而緩其色當黑今反黃者是土來克水爲
大逆十死不治也又腎病面色黑其氣虛弱翁翁少氣
兩耳若聾精自出飲食少小便清膝下冷其脈沈滑而
遲爲可治又冬脈沈濡而滑曰平反浮濇而短肺來乘
腎雖病易治反弦細而長者肝來乘腎不治自愈反浮
大而洪心來乘腎不爲害腎病腹大脛腫喘欬身重寢
汗出憎風虛則胷中痛大腹小腹痛清厥意不樂也陰

邪入腎則骨痛腰上引項脊背疼此皆舉重用力及過
房汗出當風浴水或久立則傷腎也又其脉急甚則腎
痿痠疾微急則沈厥奔豚足不收緩甚則折脊微緩則
洞泄食不化入咽還出大甚則陰痿微大則石水起臍
下至小腹其腫垂垂然而上至胃脘者死不治小甚則
洞泄微小則消痺滑甚則癰癩微滑則骨痿坐弗能起
目視見花濇甚則大壅塞微濇則不月疾痔又其脉之
至也上堅而大有積氣在陰中及腹內名曰腎痺得之
因浴冷水而臥脈來沈而大堅浮而緊苦手足骨腫厥

陰痿不起腰背疼小腹腫心下水氣時脹滿而洞泄此
皆浴水中身未乾而合房得之也虛則夢舟溺人得其
時夢伏水中若有所畏盛實則夢腰脊離解不相屬厥
邪客於腎則夢臨深投水中腎脹則腹痛滿引背怏怏
然腰痺痛腎病夜半慧四季甚下晡靜腎生病則口熱
舌乾咽腫上氣嗑乾及心煩而痛黃疸腸澼痿厥腰脊
背急痛嗜卧足下熱而痛脘酸病久不已則腿筋痛小
便閉而兩脇脹支滿目盲者死腎之積苦腰脊相引而
疼飢見飽減此腎中寒結在臍下也諸積大法其脈來

細軟而附骨者是也又面黑目白腎已內傷八日死又
陰縮小便不出出而不快者亦死又其色青黃連耳左
右其人年三十許百日死若偏在一邊一月死實則煩
悶臍下重熱則口舌乾焦而小便澀黃寒則陰中與腰
脊俱疼面黑耳乾噦而不食或嘔血者是也又喉中鳴
坐而喘咳唾血出亦爲腎虛寒氣欲絕也寒熱虛實旣
明詳細調救卽十可十全之道也

論膀胱虛實寒熱生死逆順脉證之法第三十一
膀胱者津液之腑與腎爲表裏號曰水曹掾又名玉海

足太陽是其經也總通於五腑所以五腑有疾卽應膀胱膀胱有疾卽應胞囊也傷熱則小便不利熱入膀胱則其氣急而苦小便黃澀也膀胱寒則小便數而清也又石水發則其根在膀胱四肢瘦小其腹脹大者是也又膀胱欬久不已則傳入三焦腸滿而不欲飲食也然上焦主心肺之病人有熱則食不入胃寒則精神不守泄利不止語聲不出也實則上絕於心氣不行也虛則引起氣之于肺也其三焦之氣和則五臟六腑皆和逆則皆逆膀胱中有厥陰氣則夢行不快滿脹則小便不

下臍下重悶或肩痛也絕則三日死死時雞鳴也其三焦之論備云于後

論三焦虛實寒熱生死逆順脈證之法第三十二
三焦者人之三元之氣也號曰中清之腑總領五臟六腑榮衛經絡內外左右上下之氣也三焦通於內外左右上下皆通也其於周身灌體和內調外榮左養右導上宣下莫大於此者也又名玉海水道上則曰三管中則名霍亂下則曰走哺名雖三而歸一有其名而無形者也亦號曰孤獨之腑而衛出於上榮出於中上者絡

脈之系也中者經脈之系也下者水道之系也亦又屬膀胱之宗始主通陰陽調虛實呼吸有病則苦腹脹氣滿小腹堅溺而不得便而窘迫也溢則作水留則爲脹足太陽是其經也又上焦實熱則額汗出而身無汗能食而氣不利舌乾口焦咽閉之類腹脹時時脇肋痛也寒則不入食吐酸水胷背引痛噎乾津不納也實則食已還出膨膨然不樂虛則不能制下遺便溺而頭面腫也中焦實熱則上下不通腹脹而喘咳下氣不上上氣不下關格而不通也寒則下痢不止食飲不消而中滿

也虛則腸鳴鼓脹也下焦實熱則小便不通而大便難
苦重痛也虛寒則大小便泄下而不止三焦之氣和則
內外和逆則內外逆故云三焦者人之三元之氣也宜
修養矣

論痺第三十三

痺者風寒暑溼之氣中於人臟腑之爲也入腑則病淺
易治入臟則病深難治而有風痺有寒痺有溼痺有熱
痺有氣痺而又有筋骨血肉氣之五痺也大凡風寒暑
溼之邪入於肝則名筋痺入於腎則名骨痺入於心則

名血痺入於脾則名肉痺入於肺則名氣痺感病則同
其治乃異痺者閉也五臟六腑感於邪氣亂於真氣閉
而不仁故曰痺病或痛或癢或淋或急或緩而不能收
持或拳而不能舒張或行立艱難或言語蹇澀或半身
不遂或四肢拳縮或口眼偏邪或手足欹側或能行步
而不能言語或能言語而不能行步或左偏枯或右壅
滯或上不通於下或下不通於上或大腑閉塞一作小便秘澀
或左右手疼痛或得疾而卽死或感邪而未亡或喘滿
而不寐或昏冒而不醒種種諸症皆出於痺也痺者風

寒暑溼之氣中於人則使之然也其於脈候形證治療之法亦各不同焉

論氣痺第三十四

氣痺者愁憂思喜怒過多則氣結於上久而不消則傷肺肺傷則生氣漸衰而邪氣愈勝留於上則胸腹痺而不能食注於下則腰脚重而不能行攻於左則左不遂衝於右則右不仁貫於舌則不能言遺於腸中則不能溺壅而不散則痛流而不聚則麻真經既損難以醫治邪氣不勝易爲痊愈其脈右手寸口沈而遲澀者是也

宜節憂思以養氣慎一作絕喜怒以全真此最爲良法也

論血痺第三十五

血痺者飲酒過多懷熱太盛或寒折於經絡或溼犯於榮衛因而血搏遂成其咎故使人血不能榮于外氣不能養于內內外已失漸漸消削左先枯則右不能舉右先枯則左不能伸上先枯則上不能制于下下先枯則下不能尅于上中先枯則不能通疎百證千狀皆失血也其脉左手寸口脈結而不流利或如斷絕者是也

論肉痺第三十六

肉痺者飲食不節膏粱肥美之所爲也脾者肉之本脾氣已失則肉不榮肉不榮則肌膚不滑澤肌膚不滑澤則腠理疎則風寒暑溼之邪易爲入故久不治則爲肉痺也肉痺之狀其先能食而不能充悅四肢緩而不收持者是也其右關脈舉按皆無力而往來澀者是也宜節飲食以調其臟常起居以安其脾然後依經補瀉以求其愈爾

論筋痺第三十七

筋痺者由怒叫無時行步奔急淫邪傷肝肝失其氣因

而寒熱所客久而不去流入筋會則使入筋急而不能
行步舒緩也故曰筋痺宜活血以補肝溫氣以養腎然
後服餌湯丸治得其宜卽疾瘳已不然則害人矣其脈
左關中弦急而數浮沈有力者是也

論骨痺第三十八

骨痺者乃嗜慾不節傷於腎也腎氣內消則不能關禁
不能關禁則中上俱亂中上俱亂則三焦之氣痞而不
通三焦痞而飲食不糟粕飲食不糟粕則精氣日衰精
氣日衰則邪氣妄入邪氣妄入則上衝心舌上衝心舌

則爲不語中犯脾胃則爲不充下流腰膝則爲不遂傍
攻四肢則爲不仁寒在中則脈遲熱在中則脈數風在
中則脈浮溼在中則脈濡虛在中則脈滑其證不一要
在詳明治療之法列于後章

論治中風偏枯之法第三十九

人病中風偏枯其脈數而面乾黑驚手足不遂語言蹇
澀治之奈何在上則吐之在中則瀉之在下則補之在
外則發之在內則溫之按之熨之也吐謂出其涎也瀉
謂通其塞也補謂益其不足也發謂發其汗也溫謂驅

中藏經 卷三
其溼也按謂散其氣也熨謂助其陽也治之各合其宜
安可一揆在求其本脈浮則發之脈滑則吐之脈伏而
澀則瀉之脈緊則溫之脈遲則熨之脈閉則按之要察
其可否故不可一揆而治者也

論五丁狀候第四十

五丁者皆由喜怒憂思衝寒冒熱恣飲醕酒多嗜甘肥
毒魚酢醬色慾過度之所爲也畜其毒邪浸漬臟腑久
不攄散始變爲丁其名有五一日白丁二日赤丁三日
黃丁四日黑丁五日青丁白丁者起於右鼻下初起如

粟米根赤頭白或頑麻或痛癢使人憎寒頭重狀若傷
寒不欲食胃膈滿悶喘促昏冒者死未者可治此疾不
過五日禍必至矣宜急治之赤丁在舌下根頭俱赤發
痛舌本硬不能言多驚煩悶恍惚多渴引一作飲水不休
小便不通發狂者死未者可治此疾不過七日禍必至
也不可治矣大人小兒皆能患也黃丁者起于唇齒齦
邊其色黃中有黃水發則令人多一作能食而還一作復出
手足麻木涎出不止腹脹而煩多睡不寐者死未者可
治黑丁者起於耳前狀如癥瘕其色黑長減不定使人

牙關急腰脊腳膝不仁不然即痛亦不出三歲禍必至
 矣不可治也此由腎氣漸絕故也宜慎慾事青丁者起
 于目下始如癩癥其色青硬如石使人目昏昏然無所
 見多恐悸惕睡不安寧久不已則令人目盲或脫精有
 此則不出一年禍必至矣白丁者其根在肺赤丁者其
 根在心黃丁者其根在脾黑丁者其根在腎青丁者其
 根在肝五丁之候一作疾最爲臣疾一作病不可不察也治
 療之法一一如左

論癰疽瘡腫第四十一

夫癰疽瘡腫之所作也皆五臟六腑畜毒不流則生

本

皆有矣非獨因榮衛壅塞而發者也其行也有處其主也

有歸假令發于喉舌者心之毒也發于皮毛者肺之毒

也發于肌肉者脾之毒也發于骨髓者腎之毒也

關肝作

發于下者陰中之毒也發于上者陽中之毒也發于外

者六腑之毒也發于內者五臟之毒也故內曰壞外曰

潰上曰從下曰逆發于上者得之速發于下者得之緩

感于六腑則易治感于五臟則難瘳也又近骨者多冷

近虛者多熱近骨者久不愈則化血成甚近虛者久不

愈則傳氣成漏成蠱則多癢而少痛或先癢後痛成漏
 則多痛而少癢或不痛或不癢內虛外實者多痒而少
 痛外虛內實者多痛而少痒血不止者則多死膿疾潰
 者則多生或吐逆無度飲食不時皆癰疽之使然也種
 候萬一一作多端要憑詳治療之法列在後篇

中藏經卷三終

中藏經卷四

漢 華佗元化著

論腳弱狀候不同第四十二

人之病腳氣與氣腳之爲異何也謂人之喜怒憂思寒熱邪毒之氣自內而注入于腳則名氣腳也風寒暑溼邪毒之氣從外而入于腳膝漸傳於內則名腳氣也然內外皆以邪奪正故使人病形頗相類例其於治療亦有上下先後也故分別其目若一揆而不察其由則無理致其瘳也夫喜怒憂思寒熱邪毒之氣流入肢節或

注於腳膝其狀類諸風歷節偏枯癱腫之證但入于腳
膝則謂之氣腳也若從外而入于足從足而入臟者乃
謂之腳氣也氣腳者先治內而次治外腳氣者先治外
而次治內實者利之虛者益之又人之病腳氣多者何
也謂人之心肺二經起于手脾腎肝三經起于足手則
清邪中之足則濁邪中之人身之苦者手足耳而足則
最重艱苦故風寒暑濕之氣多中於足以此腳氣之病
多也然而得之病者從漸而生疾但始萌而不悟悟亦
不曉醫家不爲腳氣將爲別疾治療不明因循至大身

居危地本從微起浸成巨候流入臟腑傷於四肢頭項
腹背也而疾未甚終不能知覺也特因他而作或如傷
寒或如中暑或腹背疼痛或肢節不仁或語言錯亂或
精神昏昧或時喘乏或暴盲聾或飲食不人或臟腑不
通或攣急不遂或舒緩不收或口眼牽搐或手足顫掉
種種多狀莫有達者故使愚俗束手受病死無告陳仁
者見之豈不傷哉今述始末略示後學請深消息至如
醉入房中飽眠露下當風取涼對月貪歡沐浴未乾而
熟睡房室纔罷而衝軒久立於低溼久伫於水涯冒雨

而行瀆寒而寢勞傷汗出食飲悲生犯諸禁忌因成疾矣其於不正之氣中於上則害於頭目害於中則蠱於心腹形於下則災於腰腳及於旁則妨於肢節千狀萬證皆屬于氣腳但起于腳膝乃謂腳氣也形候脈證亦在詳明其脈浮而弦者起於風濡而弱者起於溼洪而數者起於熱遲而澁者起於寒滑而微者起於虛牢而堅者起於實在於上則由於上在於下則由於下在於中則生於中結則因氣散則因憂緊則因怒細則因悲風者汗之而愈溼者溫之而愈熱者解之而愈寒者熨

之而愈虛者補之實者瀉之氣者流之憂者寬之怒者
悅之悲者和之能通此者乃謂之良醫又腳氣之病傳
於心腎則十死不治入心則恍惚忘謬嘔吐食不入眠
不安甯口眼不定左手寸口手脈乍大乍小乍有乍無
者是也入腎則腰腳俱腫小便不通呻吟不絕目額皆
見黑色氣時上衝胃腹而喘其左手尺中脈絕者是也
切宜詳審矣

論水腫脈證生死候第四十三

人中百病難療者莫過於水也水者腎之制也腎者人

之本也腎氣壯則水還於海腎氣虛則水散於皮又三焦壅塞榮衛閉格血氣不從虛實交變水隨氣流故爲水病有腫於頭面者有腫於腰腳者有腫於四肢者有腫於雙目者有因嗽而發者有因勞而生者有因凝滯而起者有因虛乏而成者有因五臟而出者有因六腑而來者類目多種而狀各不同所以難治者由此百狀人難曉達縱曉其端則又苦人以驕恣不循理法觸冒禁忌弗能備矣故人中水疾死者多矣水有十名具於篇末一曰青水二曰赤水三曰黃水四曰白水五曰黑

水六曰立水七日風水八曰石水九曰裏水十曰氣水
青水者其根起於肝其狀先從面腫而漸行一身也赤
水者其根起於心其狀先從胷腫起也黃水者其根起
於脾其狀先從腹腫也白水者其根起於肺其狀先從
腳腫而上氣喘噉也黑水者其根起於腎其狀先從足
趺腫立水者其根起於膽其狀先從頭面起腫而至足
者是也風水者其根起於胃其狀先從四肢起腹滿大
而通身腫也石水者其根起於脾其狀起臍下而腹獨
大是也裏水者其根在小腸其狀先從小腹脹而不腫

漸漸而腫也

又注云一作小氣水者其根在大腸其狀腹脹而暴腫也

氣水者其根在大腸其狀

乍來乍去乍盛乍衰者是也此良由上下不通關竅不

利氣血痞格陰陽不調而致之也其脈洪大者可治微

細者不可治也又消渴之疾久不愈令人患水氣其水

臨時發散歸於五臟六腑則生為病也消渴者因冒風

衝熱飢飽失節飲酒過量嗜慾傷頻或餌金石久而積

成使之然也

論諸淋及小便不利第四十四

諸淋與小便不利者皆由五臟不通六腑不和三焦痞

澀榮衛耗失冒熱飲酒過醉入房竭散精神勞傷氣血
或因女色興而敗精不出或因迷寵不已而真髓多輸
或驚惶不次或思慮未甯或飢飽過時或奔馳才定或
隱忍大小便或發泄久興或寒入膀胱或暑中胞囊傷
茲不慎致起斯疾狀候變異名亦不同則有冷熱氣勞
膏砂虛實之八種耳冷淋者小便數色白如泔也熱淋
者小便澀而色赤如血也氣淋者臍腹滿悶小便不通
利而痛也勞淋者小便淋瀝不絕如水之滴漏而不斷
絕也膏淋者小便中出物如脂膏也砂淋者臍腹中隱

痛小便難其痛不可忍須臾從小便中下如砂石之類
有大者如阜子或赤或白一作黃色澤不定此由腎氣弱
而貪於女色房而不泄泄而不止虛傷真氣邪熱漸強
結聚而成砂又如以水煮鹽火大水少鹽漸成石之類
謂腎者水也鹹歸於腎水消於下虛熱日甚煎結而成
此非一時而作也蓋遠久乃發成卽五歲敗卽三年壯
人五載禍必至矣宜乎急攻八淋之中唯此最危其脈
盛大而實者可治虛小而澁者不可治虛者謂腎與膀
胱俱虛而精滑夢泄小便不禁者也實則謂經絡閉澁

水道不利而莖痛腿酸者也又諸淋之病與淋相從者活反者死凶治療之際亦在詳酌耳

論服餌得失第四十五

石之與金有服餌得失者蓋以其宜與不宜也或草或木或金或石或單方得力或羣隊獲功或金石毒發而致斃或草木勢助而能全其驗不一者何也其本實者得宣通之性必延其壽其本虛者得補益之情必長其年虛而過瀉實乃更增干死其千萬歿其萬則決然也又有年少之輩富貴之人恃其藥力恣其酒慾誇弄其

中藏經 卷四
術暗使精神內損藥力扶持忽然疾作何能救療如是
者豈知災從內發但恐藥餌無功實可歎哉其於久服
方藥在審其宜人藥相合效豈妄邪假如臟不足則補
其臟腑有餘則瀉其腑外實則理外內虛則養內上塞
則引上下塞則通下中瀯一作結則解中左病則治左右
病則治右上下左右內外虛實各稱其法安有橫天者
也故藥無不効病無不愈者切務於謹察矣

辨三痞論并方第四十六

金石草木單服皆可以不死者有驗無驗在乎有志無

志也雖能久服而有其藥熱壅塞而不散或上或下或
痞或澀各有其候請速詳明用具此法免敗其志皆於
壽矣謹論候并方具在後篇

辨上痞候并方

上痞者頭眩目昏面赤心悸肢節痛前後不仁多痰短
氣懼火喜寒又狀若中風之類者是也宜用後方

桑白皮潤一寸長一尺檳榔一枚木通一尺去皮一本作一兩

大黃三分溼紙煨黃芩一分澤瀉二兩

右剉為龕末水五升煮取三升取清汁分二一本服

食後臨卧服

辨中痞候并方

中痞者腸滿四肢倦行立艱難食已嘔吐冒昧減食或渴者是也宜用後方

大黃

一兩濕紙十重包裹煨令香熟切片子

檳榔

二枚

木香

一分

右為末生蜜為圓如桐子大每服三十九生薑湯下食後日午日進二服未減加之効即勿再服附方

桂

五錢不見火

檳榔

一箇

黑牽牛

四兩生為末二兩

右爲末蜜酒調二錢以利爲度

辨下痞候并方

下痞者小便不利臍下滿硬語言蹇滯腰背疼痛腳重不能立行者是也宜用後方

瞿麥頭子

一兩

官桂

一分

甘遂

三分

車前子

炒一兩

右爲末以獷猪腎一箇去筋膜薄批開入藥末二錢

勻糝濕紙裏慢火煨熟空心細嚼溫酒送下以大利

爲度小便未利臍腹未軟更服附方

葱白一寸去心入硃砂末一錢安葱心中兩頭以
線子繫之溼紙包煨熟用冷醕酒送下空心服以
効爲度

論諸病治療交錯致於死候第四十七

夫病者有宜湯者有宜圓者有宜散者有宜下者有宜
吐者有宜汗者有宜灸者有宜鍼者有宜補者有宜按
摩者有宜導引者有宜蒸熨者有宜澡洗者有宜悅愉
者有宜和緩者有宜水者有宜火者種種之法豈能一
也若非良善精博難爲取愈其庸下識淺亂投湯圓下

汗補吐動使交錯輕者令重重者令死舉世皆然且湯
可以蕩滌臟腑開通經絡調品陰陽祛分邪惡潤澤枯
朽悅養皮膚益充氣力扶助困竭莫離於湯也圓可以
逐風冷破堅癥消積聚進飲食舒榮衛開關竅緩緩然
叅合無出於圓也散者能祛風寒暑溼之氣攄寒溼穢
毒之邪發揚四肢之壅滯除剪五臟之結伏開腸和胃
行脈通經莫過於散也下則疎豁閉塞補則益助虛乏
灸則起陰通陽鍼則行榮引衛導引則可以逐客邪於
關節按摩則可以驅浮淫於肌肉蒸熨辟冷煖洗生陽

悅愉爽神和緩安氣若實而不下則使人心腹脹滿煩
亂鼓腫若虛而不補則使人氣血消散精神耗亡肌肉
脫失志喜昏迷可汗而不汗則使人毛孔關塞悶絕而
終合吐而不吐則使人結胃上喘水食不入而死當灸
而不灸則使人冷氣重凝陰毒內聚厥氣上衝分隊不
散以致消滅當鍼而不鍼則使人榮衛不行經絡不利
邪漸勝真冒昧而昏宜導引而不導引則使人邪侵關
節固結難通宜按摩而不按摩則使人淫隨肌肉久留
不消宜蒸熨而不蒸熨則使人冷氣潛伏漸成痺厥宜

澡洗而不澡洗則使人陽氣上行陰邪相害不當下而
下則使人開腸蕩胃洞泄不禁不當汗而汗則使人肌
肉消絕津液枯耗不當吐而吐則使人心神煩亂臟腑
奔衝不當灸而灸則使人重傷經絡內蓄炎毒反害中
和致於不可救不當鍼而鍼則使人氣血散失關機細
縮不當導引而導引則使人真氣勞敗邪氣妄行不當
按摩而按摩則使人肌肉腫脹筋骨舒張不當蒸熨而
蒸熨則使人陽氣徧行陰氣內聚不當淋塗而淋塗則
使人溼侵皮膚熱生肌體不當悅愉而悅愉則使人神

失氣消精神不快不當和緩而和緩則使人氣停意折
健忘傷志大凡治療要合其宜脈狀病候少陳於後凡
脈不緊數則勿發其汗脈不疾數不可以下心胃不閉
尺脈微弱不可以吐關節不急榮衛不壅不可以鍼陰
氣不盛陽氣不衰勿灸內無客邪勿導引外無淫氣勿
按摩皮膚不痺勿蒸熨肌肉不寒勿煖洗神不凝迷勿
悅愉氣不急奔勿和緩順此者生逆此者死耳脈病之
法備說在前

論診雜病必死候第四十八

夫人生氣健壯者外色光華內脈平調五臟六腑之氣
消耗則脈無所依色無所澤如是者百無一生雖能飲
食行立而端然不悟不知死之逼矣實爲痛也其大法
列之於後

病瞪目引水心下牢滿其脈濡而微者死

病吐衄瀉血其脈浮大牢數者死

病妄言身熱手足冷其脈細微者死

病大洩不止其脈緊大而滑者死

病頭目痛其脈澹短者死

病腹中痛其脈浮大而長者死

病腹痛而喘其脈滑而利數而緊者死

病四逆者其脈浮大而短者死

病耳無聞其脈浮大而濇者死

病腦痛其脈緩而大者死

左病右痛上病下痛者死

人不病而脈病者死

病厥逆呼之不應脈絕者死

病人脈宜大反小者死

肥人脈細欲絕者死

瘦人脈躁者死

人脈本滑利而反澁者死

人脈本長而反短者死

人尺脈上應寸口太遲者死

溫病三四日未汗脈太疾者死

溫病脈細微而往來不快胃中閉者死

溫病發熱甚脈反細小者死

病甚脈往來不調者死

溫病腹中痛下痢者死

溫病汗不出出不至足者死

病瘧腰脊強急瘳癢者死

病心腹脹滿痛不止脈堅大洪者死

痢血不止身熱脈數者死

病腹滿四逆脈長者死

熱病七八日汗當出反不出脈絕者死

熱病七八日不汗躁狂口舌焦黑脈反細弱者死

熱病未汗出而脈太盛者死

熱病汗出而脈未靜往來轉大者死

病咳嗽脈數身瘦者死

暴咳嗽脈散者死

病咳形肥脈急甚者死

病嗽而嘔便滑不禁脈弦欲絕者死

病諸嗽喘脈沈而浮者死

浮字疑誤

病上氣脈數者死

病肌熱形瘦脫肛熱不去脈甚緊急者死

病腸癖轉筋脈極數者死

病中風痿躄不仁脈緊急者死

病上氣喘急四肢寒脈澁者死

病寒熱瘕瘕脈大者死

病金瘡血不止脈大者死

病墜損內傷脈小弱者死

病傷寒身熱甚脈反小者死

病厥逆汗出脈虛而緩者死

病洞泄不下食脈急者死

病腸澼下白膿者死

病腸澀下膿血脈懸絕者死

病腸澀下膿血身有寒脈絕者死

病咳嗽脈沈堅者死

病腸中有積聚脈虛弱者死

病水氣脈微而小者死

病水脹如鼓脈虛小澁者死

病泄注脈浮大而滑者死

病內外俱虛卧不得安身冷脈細微嘔而不入食者死

病冷氣上攻脈逆而澁者死

卒死脈堅而細微者死

熱病三五日頭痛身熱食如故脈直而疾者八日死

久病脈實者死又虛緩虛微虛滑弦急者死

卒病脈弦而數者死

凡此凶脈十死十百死百不可治也

中藏經卷四終

中藏經卷五

江陰朱氏校刊本

漢 華佗元化著

察聲色形證決死法第四十九

凡人五臟六腑榮衛關竅宜平生氣血順度循環無終是爲不病之本若有缺絕則禍必來矣要在臨病之時存神內想息氣內觀心不妄視著意精察方能通神明探幽微斷死決生千無一誤死之證兆具之于後

黑色起于耳目鼻上漸入於口者死

赤色見于耳目額者五日死

按脈經額作顴頰

黑白色入口鼻目中者五日死

按脈經作三日

黑或如馬肝色望之如青近則如黑者死

張口如魚出氣不反者死

循摸衣縫者死

妄語錯亂及不能語者死熱病即不死

尸臭不可近者死

面目直視者死

按脈經連下節作目直視肩息者一日死

肩息者一日死

面青人中反者三日死

按脈經作脣青

五針米刃封此本

面無光牙齒黑者死

面青目黑者死

面白目黑者十日死

面赤眼黃即時死

面黑目白者十日死

面青目黃者五日死

眉系傾者七日死

齒忽黑色者三十日死

按脈經作
十三日死

髮直者十五日死

遺尿不覺者五六日死

唇口乍乾黑者死

爪中青黑色死

頭目久痛卒視不明者死

舌卷卵縮者死

面黑直視者死

面青目白者死

面黃目白者死

按脈絕作不死
白如枯骨者死

面目俱白者死

面目青黑者死

面青唇黑者死

髮如麻喜怒不調者死

髮眉如衝起者死

面色黑脇滿不能反側者死

面色蒼黑卒腫者死

掌腫無紋臍腫出囊莖俱腫者死

手足爪甲肉黑色者死

汗出不流者死

昏反人中滿者死

陰陽俱絕目匡陷者死

五臟內絕神氣不守其聲嘶者死

陽絕陰結精神恍惚撮空裂衣者死

陰陽俱閉失音者死

榮衛耗散面目浮腫者死

心絕於腎肩息回眦目直者一日死

肺絕則氣出不反口如魚口者三日死

骨絕腰脊痛腎中重不可反側足膝後平者五日死

腎絕大便赤澁下血耳乾腳浮舌腫者六日死又曰足腫者九日死

脾絕口冷足腫脹泄不覺十二日死

筋絕魂驚虛恐手足爪甲青呼罵不休者八九日死

肝絕汗出如水恐懼不安伏卧目直面青者八日死又

曰卽時死

胃絕齒落面黃者七日死又曰十日死

凡此察聽之更須詳酌者矣

藥方

曼應圓

甘遂 三兩

芫花 三兩

大戟 二兩

巴豆 二兩 去皮

乾漆 二兩

皂角 七挺 去皮

大黃 三兩 煨

三稜 三兩

蓬莪茂 二兩

檳榔 一兩

木通 一兩

當歸 五兩

雷丸 一兩

黑牽牛 五兩

桑白皮 二兩

五靈脂 五兩

硃砂 三兩

訶子 一兩 麩裏 煨熟去麩

澤瀉 二兩

梔子仁 二兩

右各洗了細剉入米醋二升浸三日入銀石器中慢

火熬令醋盡焙乾再炒黃黑色存性入後藥同爲末
如後

木香

肉桂

陳皮

去白

丁香

青皮

去白

肉豆蔻

黃耆

白朮

沒藥

附子

炮裂去皮
臍各一兩

芍藥

川芎

白牽牛

炒

天南星

水
煮

鱉甲

醋製浸
炙令黃

熟地黃

酒浸
一宿

牡丹皮

赤茯苓

芸薹子

炒

乾薑

各二兩炮
裂去皮

右同爲末醋糊丸藜豆大用在後須至誠靜室中合
方驗也

結胃油漿水下七丸未動再服

積殄食癥水下三丸

水氣通身腫茯苓湯下五丸

膈噎丁香湯下三丸

因積成勞鱉甲湯下二丸

腹下一切痛醋湯下七丸

小腸疝癖茴香湯下三丸

大小便不通蜜湯下五丸

懸心痛茱萸湯下五丸

卒死以小便湯下七丸

白痢乾薑湯下一丸

赤痢甘草湯下一丸

胃冷吐食丁香湯下二丸

大靈治傳尸明月丹

雄黃半兩

兔糞二兩

天靈蓋一兩

驚甲製一分

木香半兩

輕粉一分

右爲末用法酒一大升大黃半兩熬膏入前藥爲丸
彈子大硃砂爲衣傳尸勞肌瘦面黃嘔吐咳嗽不定
大先燒安息香令烟盡吸之不嗽非傳尸也不可用此
藥若烟入口咳而不能禁止乃尸也宜用此藥五更
初服勿使人知以童子小便同酒共一盞化一丸服
之如人行二十里止吐出虫其狀如燈心而細長及
寸或如爛李又如蝦蟆狀各不同未效次日初服以
應爲度

解勞生肌進食活血養心地黃煎丸

生地黄 升 汁五

杏仁 升 汁五

生薑 升 汁五

藕汁 升 五

薄荷 升 汁五

鵝梨 升 汁一

法酒 升 二

沙蜜 兩 四

右慢火熬成膏入後藥

柴胡 三兩 洗 去蘆

木香

人參

茯苓

山藥

柏子仁 微炒 另研

遠志 去心

枳殼 浸去穰 切麩黃

白朮 各一兩

秦朮 二兩 洗 去蘆

桔梗 兩 四

熟地黄 四兩 酒浸 一宿 切焙

麝香 半兩 細研

右丸如桐子大每日食後甘草湯下二十九

癥瘕

大黃 濕紙裹煨

礞砂

三稜 濕紙裹煨 乘熱細切

乾漆 炒至烟盡

巴豆 去皮出油 各一兩

右為末入醋一升熬成膏入後藥

木香

丁香

枳殼 去穰切 鹽炒黃

官桂 各一兩半

右為末入前膏和杵為丸

通氣阿魏丸方 治諸氣不通胸背痛結塞悶亂

阿魏 二兩 酒熬

沉香 一兩

桂 半兩

黑牽牛 一兩 炒

右將阿魏先熬成膏次入前藥和丸如櫻桃大硃砂為衣一丸酒化下

醉仙丹 治偏枯不遂皮膚不仁

麻黃 水煮焙乾 為末一兩 天南星 七箇 炮

黑附子 三箇 炮 去皮

地龍 七條 去土

右除麻黃先為末次將麻黃末入酒一升熬成膏入前末丸如彈子大每日食後臨臥酒化一兩汗出效

偏枯不遂皮膚不仁者皆由五藏氣虛風寒暑濕之邪蓄積在中久而不散乃成疾焉以前法主之

硝黃七神丹

朴硝二斤

硃砂五兩

大黃七兩 紙裹

梔子二兩

豆豉半斤以絹袋盛之

甘遂

賦粉一兩

石水二斗熬令水盡除甘遂豉梔子大黃只取朴硝砂粉為末丸彈子大每一丸水化下以吐瀉為度

暴喘欲死方

大黃一兩濕紙裏煨

牽牛二兩炒

右爲末蜜水調二錢立止此方治上熱痰喘虛肺寒

冷者不可用

暴喉閉氣欲絕

乾漆炒令烟筒子吸之

駐顏長筭祛百病交藤丸

何首烏即交藤根也用一斤赤白者

茯苓五兩

牛膝二兩

右蜜丸酒下三十丸忌食猪羊血

通神乳香膏 貼諸毒瘡腫發背癰疽

乳香

沒藥

血竭

臘一兩

黃丹

木鱉子二兩

膩粉三錢

烏賊魚骨二兩

不灰木四兩

五靈脂二兩

海桐皮二兩

瀝青四兩

右並為末用好油四兩熬令熟下藥末熬不住手攪之令黑色滴水成珠即止

麝香丸 治一切氣漏瘡

麝香一分

乳香一分

巴豆十四箇去皮出油

右棗肉同丸任瘡上

破棺散 治厥陰面目俱青心下硬四肢冷脉細欲絕

硫黃

一兩酒煮

硃砂

一兩研

右二味酒丸鷄頭大入室中勿令人知度病人身長掘一坑深一尺入粟稗火燒坑子極熱醋五升沃令氣出衣被鋪坑以酒化一丸服之後令病人坑上臥

少時汗出

浴腸湯 治陽厥發狂將成疸

大黃

四兩濕紙裹煨

大青

一兩

梔子

二兩

甘草

一兩炙

右水五升煎去二升內朴硝五合熬去一升分四升
量虛實與之

起卒死救生丹 此方不可服

大黃半兩濕紙裹煨

膩粉半兩

硃砂

雄黃一分

右用鯁膽汁丸雞頭大用童子小便下一丸幹開口
灌之內大蒜尾一寸許入鼻中如人行五六里當吐

出涎即活

治脾厥吐瀉霍亂

附子炮裂去皮臍

乾薑

甘草炒

肉苳各等分

右用水半升藥末二錢棗七枚生薑一片煎至一盞

温服

治心脾卒痛不可忍

木香一兩

蓬朮一兩

乾漆炒至烟盡一分

右醋湯調下一錢立止

左慈真人千金地黃煎

生地黃一秤取汁熬入熟地黃末酒丸下二十九

太上延年萬勝追魂散 治勞瘦垂死方

人參

杏仁 去皮尖

天靈蓋 炒一兩

柴胡 一兩

川椒 一分去目 微炒出汗

柳桃心 一小握

右用童子小便一升末一兩煎令熟空心日午各一

服五日効

葛玄真人百補交精丸

山藥 二兩

五味子 六兩

杜仲 三兩去粗皮 剉碎炒斷絲

茯苓 二兩

酒浸一宿焙乾 澤瀉 一兩

茯苓 一兩

牛膝

二兩去蘆剉碎 酒浸一宿焙秤

山茱萸

遠志 去心

巴戟

赤石脂

栢子仁

微炒 另研

石膏

各一兩火燒 令赤出火毒

熟地黃

四兩酒浸一宿切焙乾秤

右蜜丸桐子大空心酒下二十九丸男女服之

扁鵲玉壺丸

硫黃

一斤桑灰煮入坑子內 去火毒丁細研如麩

右湯浸蒸餅為丸如梧桐子大每服十丸

療百病延壽酒

黃精 四斤

天門冬 三斤

松葉 六斤

枸杞 五斤

蒼朮 四斤

右以水三碩煮一日如釀酒法空心服之

玉霜膏 治一切熱毒喉閉

牙硝 半斤

朴硝 半斤

鵬砂 四兩

白礬 二兩

右四味火溶成汁傾入一地坑子內為末龍腦二兩

研水半盞合生蜜調一錢小兒量虛實服

三黃丸 治三疳吐血諸黃症

黃連 三兩

大黃 一兩濕紙裏煨

黃芩 二兩

右煉蜜丸桐子大用熟水下十五丸食後臨臥服
治白丁憎寒喘急昏冒方

葶藶

大黃

各一兩

桑白皮

茯苓

各二兩

檳榔

七箇

郁李仁

漢防已

各三分

右爲末每服三錢蜜水調下以疎下惡物爲度

又取白丁方

鉛霜

一分

膽礬

粉霜

各一錢

蜈蚣

一條

右爲末先刺令血出入藥米心大以醋麵餅封口立愈

治赤丁方

黃連

大黃各一兩

右爲末以生蜜和丸如桐子大每服三十丸溫水下以利爲度

又取赤丁方

杏仁七箇生用

右嚼爛漱之令津滿口吐出綿濾汁入輕粉少許調

勻以雞羽掃之

治黃丁方

巴豆

七箇去心膜

青州棗

七箇去核安巴豆在棗內以麵裹煨通赤

右爲末以礪砂醋作麵糊爲圓如棗豆大每服五圓至十圓米飲下以利爲度

又取黃丁方

黃蘗

一兩

鬱金

半兩

右爲細末以雞子青調雞羽掃上

治黑丁方

兔絲子 菖蒲

右二味等分爲末洒浸取汁掃丁上更服腎氣圓補

之

治青丁方

穀精草

蟬殼 各一兩

蒼朮 五兩

右爲末每服一錢水調服食前仍以鍼刺丁出用桑

柴灰汁洗之立效

中藏經卷五終

中藏經卷六

漢 華佗元化著

三棐圓 治小腸氣痛

吳茱萸

一兩

金鈴子

取肉并皮一兩

青皮

去穢

舶上回香

馬蘭

三味各一兩

右七味逐味於銀銚內炒令香爲末酒糊圓如梧桐子大每疾作鹽酒下三五十圓久年不差五七服可除根本

金鈴圓

治小腸氣一服立愈

牽牛子

炒

青皮

白去

良薑

各等分

川楝子

舶上回香

各半兩

玄胡索

一兩

右爲末生薑自然汁煮麵糊圓如梧桐子大硃砂爲衣每服三十圓燒綿爲灰浸酒下不計時候

燒肝散

治久年不差心勞口瘡

銀州柴胡

去蘆

白朮

紅芍藥

牡丹皮

各一兩

人參

半兩

蒼朮

一兩

黑附子

炮去臍皮

石斛

去浮膜各半兩

右爲末用獾猪肝薄批去血水摻藥在上徧以荷葉

裏定濕紙包之慢火煨令過食前米飲下此藥有奇

功

補心丹 治因驚失心或因思慮過度心氣不寧狂言

妄語叫呼奔走

硃砂一分

雄黃一分并研

白附子一分錢為末

右拌勻以猪心血圓如梧桐子大更別以朱砂為衣
每服二圓臨臥用人參菖蒲湯下常服一粒能安魂

魄補心氣鎮神靈

椒紅圓 治嗽不止及補中益氣進食

小椒

揀淨二兩去閉目炒過出汗用

車蓋草 乾山藥

一兩

川附子

二兩炮去皮臍

右為細末以好酒煮淡木瓜和之再入日中杵三五

百下圓如桐子大每服十五二十圓空心食前鹽湯

溫酒任下泄瀉米飲下如喉中痰涎如水鷄聲曉夕

不止者一兩服見効

縮砂圓消積溫中順氣治風痰利胃膈尤治傷生冷嘔

逆泄瀉

天南星

四兩湯浸洗七次切焙乾秤

良薑

四兩

宿砂仁二兩

右為細末生薑自然汁煮麩糊圓如梧桐子大每服十五圓或二十圓擦生薑浸湯下不計時

強中圓 治氣消食益脾胃進飲食

白朮或蒼朮

陳皮

去穢

青皮

去穢

良薑

油炒

乾薑

炮

右各等分同為細末湯浸蒸餅搗去水和圓如梧桐

子大每服三五十圓

養胃丹

治脾胃不和全不思食中脘停寒嘔逆惡心

臟寒泄痢腹痛腸鳴常服温中養胃散飲思食

丁香一兩 白豆蔻仁半兩 人參三分

甘草半兩 半夏兩 乾薑三兩炮用乾

右爲細末煉蜜爲圓每兩作十圓每服一圓温湯化

下空心食前服之或細嚼湯下亦可造麩法半夏不

以多少湯浸洗七次焙乾搗羅爲末用生薑汁和作

餅子焙乾用之

五皮散 治男子婦人脾胃停滯頭面四肢悉腫心腹

脹滿上氣仁急胷膈煩悶痰涎上壅飲食不下行步

氣奔狀如水病先服此藥能疎理脾氣消退虛腫切
不可亂服瀉水等藥以致脾元虛損所患愈甚此藥
平良無毒多服不妨

古德生薑皮 桑白皮 陳橘皮

大腹皮 茯苓皮 各等分

右爲粗末每服三錢水一盞半煎至八分去滓不計
時候溫服忌生冷油膩硬物

立效散 治腰痛

玄胡索 當歸 官桂

右各等分酒調細末二錢七服

香芎散 治一切頭風

御香附子

半斤炒 川芎

甘草

二兩

石膏

研一兩

右爲細末每服一錢臘茶荆芥湯點服食後

古卿古敗散

治頭風血風又名荆芥散

荆芥穗

一斤 乾菊花

川芎

四兩

白朮

三兩

右爲細末食後茶調二錢此藥明目去風

再甦丹 治骨節疼痛語言不正行步艱難手足戰掉

搖拽

川烏頭

二兩

草烏頭

一兩

五靈脂

四兩

右為末滴水為圓如鷄頭大每服一圓研入酒一盞

生薑三片地黃三條乳香少許同煎至七分臨臥通

口服喫了須摩擦患處令熱徹以助藥力如合時入

乳香末一二錢即煎時更不須入

沉香飲子 治痞氣升降陰陽

沉香

木香

羌活

獨活

人參

桑白皮

微炙黃

白茯苓

紫蘇葉

各等分

右咬咀為粗末每服三大錢水一盞半大棗二枚薑五片煎至七分去滓食前溫服二滓又作一服

礞石圓 治脾積滯氣酒食所傷飲食不化惡心嘔逆

胃膈不快不思飲食胃腹脹滿臍脇有塊心脾冷痛

口吐酸水停飲冷痰疝癖癥瘕發痛無度翻胃轉食

面黃瘦乏四肢頭面浮腫臟腑不調裏急後重及十

鬲氣虛中有積婦人血氣塊硬悉皆主之

硃砂 一兩用米醋三升化開

巴豆霜 二兩半二味同人醋煮兩食久

青礞石 半兩

京三稜 一兩醋浸一宿煨二味次入煮半食久入前醋

中煮

白麵 二兩酒半并化右一味次入煮半食久

大黃 一兩半分三分一炒煨右次入煮半食久

木香 以下並為細末

檳榔

肉豆蔻

肉桂

猪牙皂角 去皮炙

乾薑 炮

丁香

蓬莪朮 各一兩

青皮 半兩

芫花 醋浸一宿炒微令有煙兩

好墨 燒令八分過

白豆蔻 各半兩

胡椒 一分

粉霜 一分研

右次第煮了次入木香等一十四味熬成膏圓如棗

豆大每服三圓酒飲薑湯雜下

紫沉消積圓

沉香

一兩
為末

阿魏

一分
研

沒藥

一兩
研

巴豆霜

四錢

硃砂

一兩
已上藥用酒蜜約度多

丁香

少一處熬成膏子然後搜藥

硫黃

青皮

高良薑

各半

檳榔

木香

人參

胡椒

官桂

各一兩

右爲末將熬下膏子搜藥勻和爲圓如梧桐子大每服五圓至七圓橘皮湯下食後臨臥常用一兩圓更看虛實加減

五勝散 治四時傷寒冒風身熱頭痛昏倦寒痰咳嗽及中滿傷寒三日以前服無不効

甘草 炙

石膏

白朮

五味子 各一兩

乾薑 三分

甘草

右爲細末每服二錢水一盞入生薑二片棗子一枚同煎至七分去滓服中滿以鹽煎傷風頭痛加荆芥

煎不計時候服

治傷寒咳嗽逆汗尋常亦可服

丁香

柿蒂

各一錢

甘草

良薑 各半錢

右爲末用熱湯猛點乘熱一服効

如聖散 治一切無異色瘡腫消毒併閃胸折傷接骨

定痛活養血脉已破者不可用

艸赤小豆

一升

圓蘇川烏頭

一兩

草烏頭

一兩

木乳香

兩半

蘇合香

一兩

蘇合香丸

右爲細末每服一錢入白麵一錢瘡腫用水調稀煮
一兩沸放溫攤紙花上貼患處傷折用醋調骨損用
黃米粥調依患處大小貼之用帛子纏繫或以杉木
篾夾五日一換六十日當差

中藏經卷六終

中藥盤谷六烈

莢夾正日一餅六十日當安

實米粥隨公熟製大小服之凡病手足顛倒者以此水

一兩漸以量餅逐其土胡恩銀製海凡能補骨解凡

古為麻末我則一錢入白礬一錢每餅凡水隨煎煮

中藏經卷七

漢 華佗元化著

治惡瘡發背

燒車螯

蘆殼無有竹根代

黃蘗

甘草

右各等分爲末先以青鹽薄荷園荑樓葱煮漿水湯洗瘡男子以婦人婦人以男子唾調前藥塗之以赤水出爲度

神效乳香膏端治一切瘡腫生肌止痛一名金露

芝麻油

四兩

黃丹

一兩半

乳香

二分

羊同骨髓

四兩

麝香

少許

一方用沒藥一分

代乳香

右藥合一處入磁器內用文武火燉之成膏用綿瀘

過入磁合收之入黃蠟半兩

金屑圓一名黃圓子耑治傷風寒頭痛肌熱大効

大天南星

五箇

半夏

二兩洗七次

石膏

二兩

甘草

半兩

欒金

一兩

右爲末以生薑自然汁爲圓如鷄頭大每服二圓傷

寒頭痛荆芥茶下四肢厥冷燈焰上燒存四分性服

大便不通大戟湯下小便不通大黃湯下破傷風豆
淋酒下常服茶清下並嚼嚥

白散子 治發背候取下毒無次用清涼膏貼之

白附子

大香附子

各半兩炒

黑牽牛

二兩半生半炒令熟

半夏

一分薑炙

大甘遂

一分以大麥炒候麥黃赤色去麥不用須極漫火炒之

右為末量患人虛實加減每服二錢以蜜酒調下續

飲溫酒一兩盞候所苦處刺痛為度微利三五行瀉

出惡物即差次用膏藥貼之氣盛者一服二錢餘更

裁度

清涼膏 治發背等先用白散子取之次用此藥貼之

山川當歸二兩 香白芷 木鱉子肉

白芨 芍藥 黃蘗

白斂各一兩 乳香另研 膩粉各少許

白膠少許 黃丹五兩

右用清麻油十兩煎前六味候紫色去之入槐柳枝各七寸再煎少頃又去之入黃丹五兩熬成入乳香等重綿濾入罐子內貯之用如常貼使

妙應膏 治疥癬

藺如

藜蘆

右各等分爲粗末油煎焦黑去滓入黃臘就成膏塗
擦之

治惡瘡金瘡刀斧傷見血方

降真香爲末貼之入水並無妨絕妙

治嵌甲累効

硃砂錢一

乳香錢一

膩粉半錢

橄欖核三箇燒

灰存性

黃丹一字

右爲末入生油調先以鹽湯洗淨揩乾傅之兩上効

治惡瘡疥癬

巴豆

一十一粒油煎令沸去巴豆不用

蛇床

藺茹

右後二味等分爲細末入輕粉少許用巴豆油調傅

之及指痒處

佛手膏

治膿窠瘡神効

大戟

細辛

蛇床子

各一兩

雄黃

白膠香

青州蝎

黃蘗

黃丹

各半兩

白礬

一錢

右爲末以清油八兩熬煙出次下去皮巴豆四七粒
槐枝二七節候焦取去不用次下黃臘一兩松脂二
兩次下前九味末以槐枝不住攪成膏磁合內貯又
名紫霜膏

治發背一切癰疽金石藥毒發

以紫背車螯大者鹽塗固濟火煨通紅放冷取出
研爲極細末地上出火毒一宿以甘草膏子圓如
梧桐子大每服三五十圓甘草湯下日進三服第
三日取下惡物用後藥貼之

貼瘡白膏藥

以寒水石不拘多少火煨通紅入磁器中封口令
 密沉井中一宿取出研極細末以臘月豬脂和如
 膏稀稠得所自瘡赤盡處塗之闊一指許上以薄
 紙爲花子中心留一孔貼定漸次退即迤邐移近
 裏至愈紙花孔子外所留紙令與所塗藥闊狹相

等

接骨散 治折傷

黃狗頭骨

一箇以湯去毛便以湯連皮煮去皮
 取骨泥固炭火煨過去泥爲細末

官桂末

牡蠣泥固煨

右三味各爲細末每用狗骨末五錢入牡蠣末三錢
官桂末二錢並炒以糯米粥鋪絹帛上方摻藥在粥
上裹損傷處大段折傷者上更以竹片夾之少時卽
痒不可抓之輕以手拍三兩日効

治金瘡妙方

以石灰不拘多少和人血作餅厚兩指許風乾旋
切傅之

治內損吐血

以飛羅麵微炒以濃墨二茶匙調二錢許服立効

越桃散 治下血及血利

越桃 梔子也

槐花

青州棗

乾薑

右各等分燒存性爲末陳米飲調下二錢

炙肝散 逐胃中風邪益脾進食凡人虛弱用補藥日

久漸至瘦損食少倦怠大便頻數泄漏服此無不取

效妙

白朮

白芍藥

山白芷

桔 各四兩

右各生為細末用不入水獐猪肝五兩作小片子或塊子拌藥十五錢細切蒸白二寸鹽一錢同拌肝令勻以竹簽子作串慢火炙香熟啖之米飲送下空心食前各一服渴勿喫冷水半月必安

地黃散 牢牙去齒病

出僧文瑩湘江野錄

歌曰

猪牙皂角及生薑西國升麻熟地黃木律旱連槐

角子細辛荷葉要相當

荷葉取心用

青鹽等分同燒煨

研殺將來使最良擦齒牢牙鬚鬢黑誰知人世有

仙方

治牙痛神驗

草萆撥

木驚子

去殼

右先研木驚子令細入萆撥同研令勻隨左右鼻內

搐之每用一豆許

治牙痛及走馬疳

用頭髮飢饑用剃面刀子細切銚內慢火燒存性

爲細末摻患處

治風氣攻注牙齒腫痛

藁本

翦草

細辛

右等分爲麤末每服三錢水二大盞煎至一盞半以
下乘熱嗽之過微覺痛少頃自止

治喉閉及腫痛

大白梅

二十五箇取肉

白礬

一錢

甘草

一錢

生草麻

四十九粒去皮

右同研勻和圓如鷄頭大以綿裹含化

絳雪 治喉閉

蘇雪 礪砂 皂大 一塊

白礬 同上

馬牙硝 一分

消石 四兩

黃丹 半兩

新巴豆 六枚

右用麤磁小碗兒一箇先煨令熱下前四味次下丹次下巴豆仍將巴豆先打破逐箇旋下候焰盡又下一箇入蛇退皮一條自然燒化以砂礬成汁候結硬未成每用少許以筆管吹在患處

碧雪 治口瘡如咽喉痛腫即含化

焰硝 二兩

甘草 二兩不炙生用

青黛 半兩

殭蠶 半兩

右爲細末取黃牛膽汁和之令勻却入膽內當風吊
臘月合過百日中用

烏龍散 治骨槽風牙垠腫有奇功

右用不蛀皂角不得搥破只剗取去皂子却入和皮
尖杏仁一箇在皂子處燒存性研細每一兩入青鹽
一分令勻不計時揩牙用

治口瘡

用五倍子爲末摻瘡上

治喉閉牙關不開者

右以白殭蠶微炒為末生薑自然汁調下一錢如神

效五部干氣末等藥

白龍散 治風毒赤爛眼眵倒睫冷熱泪不止滴水和

一為鷄頭大圓子亦得

尖白鱔粉一兩 銅礫一錢別研入

右同再研勻每用半錢百沸湯化開以手指洗眼

清中湯 治暑氣中渴

陳皮二錢 甘草一兩蜜炙焦黃腕可折

乾薑半兩濕紙裏煨

調皆可

皂角散 治五種腸風瀉血下痢糞前有血號外痔糞

後有血號內痔大腸不收號脫肛穀道四面有努肉

如妳號舉痔頭上有孔號漏並治之

黃牛角鯁

一箇
剉 蛇蛻

一條

猪牙皂角

五枚
剉

穿山甲

右四味同入瓷瓶內黃泥封固候乾先以小火燒令

烟出方用大火煨令通紅為度取出攤冷杵羅為末

患者先用胡桃肉一箇分作四分取一分臨困時研

細如糊温酒調下便睡先引蟲出至五更時温酒調
下藥末二錢至辰時更進一服取下惡物永除根本

白龍散 治消渴

寒水石 生

甘草 半生 半炙

葛粉 各等分

右為細末每服二錢濃煎麥門冬苗湯調下服立止
神驗柴胡散 治大人小兒骨熱夜間如蒸甚者不過

十數日見効

土柴胡 不以多少去蘆洗淨炙黃色 不令太焦亦不須銀州者

右為末每服二錢水一盞入地骨皮指面大二片子

同煎至七分食後溫服如虛瘦但空心服補藥食後煎下數服時時如水飲之

聖餅子 治咯血

青黛 一錢

杏仁

四十粒去皮尖以黃明蠟煎黃色取出研細

右二味再同研勻却以所煎蠟少許鎔開和之捏作

錢大餅子每服用乾柿一箇中破開入藥一餅令定

以濕紙裹慢火煨熟取出以糯米粥嚼下

治產後惡心

白朮 一分

生薑

減半

右並咬咀水一盞煎至七分溫服如神

艾煎圓 治婦人經水不止

威靈仙

一兩

良薑

一兩

金毛狗脊

一兩去黃毛

熟艾

二兩糯米糊和日乾為末
法用醋熬焙乾亦可為末

赤芍藥

一兩

附子

牛兩炮

右為末以藥一半同醋煮麪糊和餘一半藥末為圓

桐子大每服十圓溫酒下食前空心服

治血山崩甚者

以凌霄花焙乾為末酒下三錢立止晝夜不定者

一服効

治產後發熱無憂散

虎魄

一兩
研

生地黄

半斤
切

右將地黄於銀器中炒煙盡合地上出火毒乳鉢內
研為末每一兩虎魄末二錢勻合用童子小便與酒
中半調下一錢日三服

治腫毒

天南星

生為
末

白礬

研
細

右等分新汲水調塗乾再掃之

治大人小兒偏墜服訖以食壓之

防風

官桂

研細辛
辣者

右各等分爲末酒調二錢

神應烏玉丹 治男子婦人久新腸風痔漏着床頭痛

不可忍者服此藥不過三四次便見功效初得此疾

發痒或疼敷道周回多生硬核此是痔如破是漏只

下血是風苦因酒色氣風食五事過度卽成此疾人

多以外醫望治病在腸內有虫若不去根本其病不

除此藥有神効不可細述

櫻蘭

亂髮

各二兩

猪蹄甲

一十四箇
須後脚者

猬皮

四兩

牛角

三兩

苦棟樹

根二兩
半洗淨

槐角

一兩半

雷圓

芝蔴

各一兩
揀淨

真麝香

二錢

滴乳香

半兩

右除乳麝二香另研細外並細剉入藏瓶或沙合子

不固濟周回用熟炭火煨煙才盡便去火

全在體度
煨未有則

殺納不細煨
過則藥無力

入二香同研勻無灰醑酒打麩糊為圓

如梧桐子大每服八粒先細嚼胡桃一枚以温酒吞

下空心晚食前日二服如病甚日三服切忌服別藥

不過三兩日永除根本

治小兒爛癖

以白芥子不拘多少研成膏攤紙花子上貼疼硬

處坐中効

香長無味心並味性大熱賦短少食

真薑香

離浮香

蘇合

雷圓

芝蘇

蘇合

蘇合

蘇合

中藏經卷七終

蘇合

蘇合

蘇合

中藏經卷八

漢 華佗元化著

常山湯 治妊娠患瘧

常山 三兩

甘草 一兩

黃芩 三兩

烏梅 十四枚

石膏 八兩 並研

石以酒一升二合漬藥一宿煮三四沸去滓初服六合次服四合又次服二合發前次第服之今但抄五

大錢漬酒一盞

又方 治同前

常山三兩

三兩

竹葉二兩

二兩

石膏八兩

八兩

粳米一百粒

一百粒

右以水六升煮取二升半分二服第一服未發前待

食久服之次臨發時服餘一服以塗頭額及胷前五

心藥滓置頭邊當日勿近水及進飲食過發時乃飲

粥此二方皆大湯劑今但抄五大錢水一盞半煎至

七分服

鐵單散 安胎如神

以香附子炒去毛令淨為細末濃煎紫蘇湯調下

一錢

失笑膏 治婦人產後血不快刺痛等症

五靈脂

蒲黃

右等分爲細末每服二錢米醋半盞同熬成膏再入水一盞煎至七分熱服痛如失

催生治危急神妙

朱砂 半兩

乳香 一兩

右爲末端午日猪心血圓梧子大乳香湯下一粒并治小兒斑豆不出

白朮圓 治小兒白瀉

白朮

當歸

芍藥

木香 減半

右等分爲末煉蜜圓如菘豆大每服十圓十五圓不

拘時候米飲下

木香圓 治小兒喫食太早遂成疳疾腹脹疳瀉及釀

肚等病

木香

沉香

青皮 去白各一錢

肉豆蔻 一箇麵裏煨 牽牛 二錢炒

右爲細末醋麵餠圓如麻子大二三歲兒服三粒五
六歲服五七粒濃煎蘿蔔湯下

玉桂杖散 治小兒疳瘦

黃耆

人參

白茯苓

右等分爲末每服一錢水一盞煎至六分呷之不拘

時

沉香養脾圓

人參

白朮

川麴薑

炮

甘草 炙

木香

丁香

肉豆蔻 麵裹煨

縮砂 各半兩

沈香 一分

右為細末煉蜜圓一兩作十粒每服一粒嚼下食前

服化下亦得

佛手膏 治眼生翳膜并努肉赤脈攀睛翳暈冷熱淚

下及眼眶赤爛等方 一盞煎生六分四之不礙

乳香 真者研半字

硃砂 半字研

麝香 一字研

當歸 半錢判細

黃連 一錢去鬚秤判細

白礬 半字飛過研細

青鹽 一字光明者研

白砂蜜 四兩須白砂者佳

右除蜜先將上七味於乳鉢內研爛同蜜一處拌勻

入新竹筒內用油紙兩三重以綿繫扎定口勿致水
入放淨鍋內添水煮竹筒自早至午時破竹筒傾藥
以新綿或重絹濾過入藥於養瓶子內牢封埋地坑
內經宿取出點之用銅柱點每點了合眼少頃復以
溫淨水洗之翳膜嫩者是近年生者當五七次隨藥
退下翳老者頻點旬日退下卽効努肉瘀肉不過三
日隨藥以銅柱刮落努肉自然綻斷此方不謬累驗

治小兒乳癖胸腹高喘急吐乳方

以不入倉黑豆七粒去皮研極細滴水七徧和成

作七丸以青黛末裹之令徧更用白麵和作皮裹
 藥慢火煨熟去麵再研細別入膩粉生腦子麝香
 各少許再滴水丸作七丸每服一丸臨卧溫水送
 下兒子小嚼破無妨極効

神朮散治傷風頭痛聲重

內蒼朮

四兩

川芎

一兩

藁朮

二兩

炙甘草

一兩

若咬咀每服二錢水一盞生薑二片同煎至七分通

口服不拘時候

理大腸一切下血

取雄黑豈

紫小長者是

不拘多少微以皂角湯浸發動

炒熟去皮為細末煉猪脂為丸如梧桐子大每服

三十九陳米飲熟水皆得服甚妙

治婦人懷妊多墮方

熟艾

五斤米醋三斤煮乾焙為末

木鱉子

五箇研細

大赭石

二兩米醋淬七遍

右同為末煮棗肉為丸梧子大每服三十九米飲下

花紅散治惡瘡大効方

蘇孫龍骨雪白真者一兩

乳香半皂子大

古粉霜半錢

光粉二錢

輕粉用小平錢抄半錢

麝香少許

腦子少許

黃丹逐旋入看顏色粉紅即止

右合和了如患瘡先用温漿水洗淨次用好油塗瘡口上了方可將藥摻在瘡上用膏藥貼日三四次易之趙允蹈赴温倅過諸暨傳此方云親自得效渠患一漏瘡以藥用紙撚填瘡中上以膏藥貼之日生肉舊不痛遂漸覺痛有血是好肉生也

治喉閉

白殭蠶

天南星並生用

右等分爲末以生薑自然汁調一字許用筆管灌在
喉中立効仍咬乾薑皂子大引涎出

治腸風下血

榼藤子

二箇如當三錢大者如更大
只用一箇取穰另研極細

不艸皂角子

四十九粒燒
存性另研細

右拌勻每服二錢温酒調下如人行五里再以温酒
一盞趁之日一服極効

治一切癰疽地黃膏兼治毒蟲所傷

石膏 火煨

藿香葉

蚌粉

香白芷

雄黃 研

右等分同為細末以生地黃自然汁調稀稠得所塗
瘡上四圍留瘡頭已破者亦留瘡口勿塗乾即再傳
之藥厚以新水潤之其効如神極妙

萬全金花散理發背疽瘡疼痛不可忍者凡腫在脊骨
邊根株如椀蓋大上面有細頭子如粟米粒白色其
間亦有如石榴子者即疽瘡也

車螯

紫色者出海際用火煨
地上出火毒氣了研細

生黃蘗

為末

乾蘆皮

自東邊面西蘆籬障止取皮爲末

生甘草

爲末

右各爲末了旋抄車螯末黃蘗末各一錢甘草末半錢已上蘆皮末一錢半已上拌勻用津唾調以竹篋子傅腫上須蓋遍瘡根未穴者自穴已穴者惡物自出凡十上取効每傅瘡時須先用赤根葱三兩莖薄荷少許鹽少許一處煎湯放冷淋洗旋旋用帛子拭乾方可上藥應係惡瘡癩並傅之無頭者卽消有頭者卽膿出神効

治陰瘡

臘茶

五倍子等分

膩粉許少

右研細津唾調傅

治吹妳

水茸角

不拘多少新瓦上焙乾

右爲細末臨卧酒調服二錢七次日即愈已破者略

出黃水亦効水茸角狀如鬼腰帶作小窠子生三四

月開小黃花葉如夜合葉六七月採雨浙呼合萌

治風痰眩運二烏圓

川烏頭

草烏頭

各四兩

青鹽

四兩

黑豆半升

右用水二升同煮四味水耗卽用溫水添之候川烏頭半軟四破之更煮以透爛爲度去皮同煎烏頭並黑豆於石臼或木臼內搗令極爛不見白星卽就圓乾卽以煮藥水添濕同搗煮時留一盞以下水以備添勿令煮乾也圓如梧子大每服三二十圓鹽酒鹽湯任下食前

治風癩

九蒸九爆天南星爲末薑汁餽圓梧子大煎人參

苜蒲湯或麥冬湯下二十圓

治風虫牙

用大北棗一枚劈開去核入和皮巴豆一粒卻捏合於慢火上炙令焦黑如乾浮炭樣取放地上良久碾為細末以紙撚尖蘸少許入虫牙竅內不過五七次永絕根本

木香餅子

木香半兩

丁香皮二兩

益智仁一兩

香附子

四兩去粗皮炒

甘草二兩炒

蓬莪茂

二兩炮

縮砂仁 一兩麵裏煨
麵熟爲度

右爲細末水餵爲圓梧子大捏作餅子每服一二十

餅温熟水嚼下食後

治瘰癧

瞿麥

海藻

凌霄花

皂角刺 新者

北邊背陰土 另研

右等分每服三錢米飲調下食後日二服

貼已破者

用鉛炒取灰滓研細以温鹽將水洗淨貼之

二虎丹治瘧

辰砂

硫黃

右熱多加辰砂寒多加硫黃並研細棗肉爲圓如龍
眼大當發日新水七分一盞化下

金瘡藥

用上等風化石灰羅過以紫刺芥心菲一般多少
搗灰成塊陰乾旋爲末用傅之五月五日合

神仙眼藥并種空青法

秦皮

三錢去粗皮判細

乳香

一塊如棗大

胡黃連

三錢

燈心

一握七寸長

棗子

三箇

班貓

去翅頭足

古老錢

七文不判

右爲粗末入無油

去聲

器中砂器尤佳用井華水一大

碗熬去半碗用綿絹擠過再將滓以水半磁碗煎取

一盞入擠過汁同煎汁入新碗中熬似稠粥樣入小

瓷合中或角合中盛將空青併鵬砂一塊如兩豆上

飛過熬乾空青不熬再研入腦子多不妨麝香少許

四味同入藥膏內攪勻每點一粟米許在眼背頭將

手挪勻抑面候藥微澁過將沸鹽湯用軟帛片蘸洗

快則已之

種空青法

朴消半錢

白蒺藜一分

龍膽草一分

仙靈毗葉一錢

旋覆花一錢

右爲末用黃泥一塊拳大同藥和勻水調如軟飯相

似作土餅一箇用太平錢五文按五方排定於光面

墨書金木水火土五字所寫字向下錢字向上隨五

方安用礪砂如豆大每錢安四塊在四字孔罅中煩

要乾黃土上頓着土餅將新砂盆一箇蓋之又將燥

黃土蓋盆冬月十日夏月五日取出於錢上摘取下
細研入藥此為種空青法不可嫩亦不可老須得中
也

治胞損小便不禁

牡丹須細花者不然無効

白牡丹

根皮為末一錢

白芨

為末一錢

生絹

一尺

右同以水煎如飴每服半盞

治喘嗽上氣

蒲頰葉治一切肺喘劇甚者効如神焙碾為細末

米飲調下二錢七併服取差氣味清香其實酸澁

夏紅可食核如棗核類山茱萸揀葉背白者用江西
謂之盧都子

治蛇傷

香白芷

右為末濃煎麥門冬湯調下二錢神效

換骨丹 治一切卒中手足頑麻腰膝沉重左癱右瘓

截四時傷寒婦人血刺產前產後每一粒酒一盞碎
搥浸至夜溫動化散臨睡和滓服小兒驚搐米飲化

半圓

桑白皮

川芎

吳白朮

紫河車

威靈仙

蔓菁子

各二兩

人參

防風

何首烏

各二兩

地骨皮

五味子

木香

苦參

各一兩

犀角

半兩

麝香

龍腦

各半錢

石爲細末用膏和

作膏法

蒼朮

半斤

槐角

半斤

地黃

三斤去根不去節判細

右用河水一斗八升井水亦得同熬至三四升去滓
留清者再熬成膏和前藥每兩作八圓硃砂為衣

治痢疾神効香粟飲子

丁香五枚

鷲粟殼五箇炙黃

甘草一寸炙

白豆蔻仁一枚

乳香一皂子大

右咬咀以水一碗煎至半碗温服

治爛眵風眼

宣黃連半兩去鬚

大棗肉三七箇去核

杏仁五十粒不去皮尖

腦子一字

右一處用雪水一升砂鍋內文武火煮留一盞許
三七日以銅筋點食後臨臥日可三四次點之杏仁
去尖

救百物入咽喉鯁欲死

茯苓

貫眾

甘草

右各等分米飲調一錢

中藏經卷八終

中廣經卷八

白米...

...

...

...

...

...

...

...